

四庫全書

史部

欽定四庫全書

史部

水經注釋卷十九

詳校官監察御史<sub>臣</sub>周元良

刑部郎中<sub>臣</sub>許兆椿覆勘

總校官降調編修<sub>臣</sub>倉聖脉

校對官編修<sub>臣</sub>卹庭澐

謄錄監生<sub>臣</sub>倪桂馨

欽定四庫全書

水經注釋卷九

仁和趙一清撰

清水

沁水

淇水

蕩水

洹水

清水出河內脩武縣之北黑山

黑山在縣北白鹿山東清水所出也上承諸陂散泉

積以成川西南流屈曲瀑布垂巖懸河注壑二十餘

丈雷扑之聲震動山谷左右石壁曾深獸跡不交隍  
中散水霧合視不見底南峯北嶺多結禪栖之士東  
巖西谷又是剎靈之圖竹柏之懷與神心妙遠仁智  
之性共山水効深更為勝處也其水歷澗飛流清冷  
洞觀謂之清水矣谿曰瑤谿又曰瑤澗清水又南與  
小瑤水合水近出西谿北窮谿東南流注之清水清  
水又東南流吳澤陂水注之水上承吳陂於脩武縣  
故城西北脩武故甯也亦曰南陽矣馬季長曰晉地

自朝歌以北至中山為東陽朝歌以南至軹為南陽  
故應劭地理風俗記云河內殷國也周名之為南陽  
又曰晉始啟南陽今南陽城是也秦始皇改曰脩武  
徐廣王隱並言始皇改瓚注漢書云案韓非書秦昭  
王越趙長平西伐脩武時秦未兼天下脩武之名久  
矣余案韓詩外傳言武王伐紂勒兵於甯更名甯曰  
脩武矣魏獻子田大陸還卒於甯是也漢高帝八年  
封酈尉魏邀為侯國亦曰大脩武有小故稱大小脩

武在東漢祖與滕公濟自玉門津而宿小脩武者也  
大陸即吳澤矣魏土地記曰修武城西北二十里有  
吳澤水陂南北二十許里東西三十里西則界溝水  
入焉水有二源北水上承河內野王縣東北光溝為  
長明溝分枝津東逕雍城南寒泉水注之水出雍城  
西北泉流南注逕雍城西春秋僖公二十四年王將  
以狄伐鄭富辰諫曰雍文之昭也京相璠曰今河內  
出山陽西有故雍城又東南注長明溝溝水又東逕

射犬城北漢大司馬張揚為將楊醜所害眭固殺醜

屯此欲北合袁紹典略曰眭固字白菟或戒固曰將

軍字菟而此邑名犬菟見犬其勢必驚宜急去菟不

從漢興平四年

一清按魏書武帝紀事在建安四年興平改元僅二年鄭氏誤記也

魏

太祖斬之於此以魏種為河內太守守之兗州叛太

祖曰唯種不棄孤及走太祖怒曰種不南走越北走

胡不汝置也射犬平禽之公曰難

一清按魏書作唯何氏焯曰此正可

與史參異同耳

其才也釋而用之長明溝水東入石澗東流

蔡溝水入馬水上承州縣北白馬溝東分謂之蔡溝  
東會長明溝水又東逕修武縣之吳亭北東入吳陂  
水次北有苟泉水入馬水出山陽縣故修武城西南  
同源分派裂為二水南為苟泉北則吳瀆二瀆雙導  
俱東入陂山陽縣東北二十五里有陸真阜南有皇  
母馬鳴二泉東南合注于吳陂也次陸真阜之東北  
得覆釜堆堆南有三泉相去四五里參差合次南注  
于陂泉在濁鹿城西建安二十五年魏封漢獻帝為



山陽公濁鹿城即是公所居也陂水之北際澤側有  
隤城也春秋隱公十一年王以攢茅隤十二邑與司

寇蘇忿生者也

何氏曰按左傳乃是以蘇忿生之京  
田與鄭蘇公武王之司寇注誤記

相璠曰河內修武縣北有故隤城實中今世俗謂之  
皮垣方四百步實中高八丈際陂北隔水一十五里  
俗所謂蘭丘也方二百步西一十里又有一丘際山  
世謂之勑丘方五百步形狀相類疑即古攢茅也杜  
預曰二邑在修武縣北所未詳也又東長泉水注之

源出白鹿山東南伏流逕一十三里重源濬發於鄧城西北東南伏流世亦謂之重泉水也又逕七賢祠東左右筠篁列植冬夏不變貞姜魏步兵校尉陳留阮籍中散大夫譙國嵇康晉司徒河內山濤司徒瑯邪王戎黃門郎河內向秀建威參軍沛國劉伶始平太守阮咸等同居山陽結自得之遊時人號之為竹林七賢也向子期所謂山陽舊居也後人立廟於其處廟南又有一泉東南流注于長泉水郭緣生述征

記所云白鹿山東南二十五里有嵇公故居以居時  
有遺竹焉蓋謂此也其水又南逕鄧城東名之為鄧  
瀆有謂之為白屋水也昔司馬懿征公孫淵還達白  
屋即於此也其水又東南流逕隕城北又東南歷澤  
注于陂泉水東流謂之八光溝而東流注于清水謂  
之長清河而東周永豐塢有丁公泉發于焦泉之右  
次東又得焦泉泉發于天門之左天井固右天門山  
石自空狀若門焉廣三丈高兩匹深丈餘更無所出

世謂之天門也東五百餘步中有石穴西向裁得容

人平行東南入徑至天井

一清按太平御覽河北天門山引水經注曰俗謂之

百家巖巖可容百家故以為名山有石穴狀如門直  
纔得通人自平地東南入便至天井與此文不同

上三匹有餘扳躡而昇至上平東西二百步南北七

百步四面嶮絕無由昇陟矣上有比丘釋僧訓精舍

寺有十餘僧給養難周多出下平有志者居之寺左

右雖樹疎挺有一石泉方丈餘清水湛然常無增減

山居者資以給飲北有石室二口舊是隱者念一之

所今無人矣泉發於北阜南流成溪世謂之焦泉也  
次東得魚鮑泉次東得張波泉次東得三淵泉梗河  
參連女宿相屬是四川在重門城西並單川南注也  
重門城昔齊王芳為司馬師廢之宮於此即魏志所  
謂送齊王于河內重門者也城在共縣故城西北二  
十里城南有安陽陂次東又得卓水陂次東有北門

陂

一清按北門陂即百門陂也魏書地形志林慮郡  
共有卓水陂柏門山柏門水南流名太清水金史

地理志衛州蘇門有百門陂蘇門即漢志之共縣隋  
曰共城金改蘇門今河南衛輝府之輝縣也縣西北

七里有蘇門山亦曰百門山有百門泉左傳定公十四年晉人敗鄭師及范氏之師于百泉即百門泉矣百與北音相近致謠陂方五百步在共縣故城西漢高帝八年

封珉罷師為共嚴侯國即共和之故國也共伯既歸帝政道遙于共山之上山在國北所謂共北山也仙者孫登之所處袁彥伯竹林七賢傳嵇叔夜嘗採藥山澤遇之于山冬以被髮自覆夏則編草為裳彈一絃琴而五聲和其水三川南合謂之清川又南逕凡城東司馬彪袁山松郡國志曰共縣有汎亭周凡伯國

春秋隱公七年經書王使凡伯來聘是也杜預曰汲  
郡共縣東南有凡城今在西南其水又西南與前四  
水總為一瀆又謂之陶水南流注于清水清水又東  
周新豐塢又東注也

一清按太平寰宇記修武縣下  
引水經注云五里泉在修武鄉

今本  
無之

### 東北過獲嘉縣北

漢書稱越相呂嘉反武帝元鼎六年巡行於汲新中  
鄉得呂嘉首因以為獲嘉縣後漢封侍中馮石為侯

國縣故城西有漢桂陽太守趙越墓冢北有碑越字  
彥善縣人也累遷桂陽郡五官將尚書僕射遭憂服  
闋守河南尹建寧中卒碑東又有一碑碑北有石柱  
石牛羊虎俱碎淪毀莫記清水又東周新樂城城在  
獲嘉縣故城東北即汲之新中鄉也

又東過汲縣北

縣故汲郡治晉太康中立城西北有石夾水飛湍濬  
急也人亦謂之磻溪言太公常釣於此也城東門北



側有太公廟廟前有碑碑云太公望者河內汲人也  
縣民故會稽太守杜宣白令崔瑗曰太公本生於汲  
舊居猶存君與高國同宗太公載在經傳今臨此國  
宜正其位以明尊祖之義於是國老王喜廷掾鄭篤  
功曹邠勒等咸曰宜之遂立壇祀為之位主城北三  
十里有太公泉泉上又有太公廟廟側高林秀水翹  
楚競茂相傳云太公之故居也晉太康中范陽盧無  
忌為汲令立碑于其上

金石錄跋尾曰晉太公碑略云太公望者此縣人大晉受

命四海一統太康二年縣之西偏有盜發冢而得竹  
策之書藏書之年當秦坑儒之前八十六歲又云其  
周志曰文王夢天帝服元襪以立于令狐之津帝曰  
昌賜汝望文王再拜稽首太公于後亦再拜稽首文  
王夢之夜太公夢之亦然其後文王見太公而詢之  
曰而名為望乎答曰唯為望文王曰吾如有所於汝  
見太公言其年月與其日且盡道其言臣以此得見  
也文王曰有之有之遂與之歸以為卿士又曰其紀  
年曰康王六年齊太公卒參考年數蓋一百一十餘  
歲按前世所傳汲冢諸書獨有紀年穆太子傳師春  
等不載所謂周志者不知為何書而杜預左氏傳後  
叙云汲冢書凡七十五卷皆藏秘府預親見之以此  
知不特十餘萬言其亡逸見于今者絕少也太公避  
碑汲縣令盧無忌立後題太康十年三月云太公避  
紂之亂屠隱市朝遯釣魚水何必渭濱然後磻溪苟

愜神心曲渚則可礧溪之名斯無嫌矣清水又東逕  
故石梁下梁跨水上橋石崩褫餘基尚存清水又東  
與倉水合水出西北方山上方山在衛縣西有倉谷  
谷有倉玉珉石故名焉其水東南流潛行地下又東  
南復出俗謂之雹水東南歷姆野自朝歌以南南暨  
清水土地平衍據臯跨澤悉姆野矣郡國志曰朝歌  
縣南有牧野竹書紀年曰周武王率西夷諸侯伐殷  
敗之于姆野詩所謂姆洋洋檀車煌煌者也有殷

大夫比干冢前有石銘題隸云殷大夫比干之墓所

記唯此今已中折不知誰所誌也

曹氏安太師比干錄曰按衛輝府舊

志云殷少師比干墓在汲縣西北一十五里墓前有殷比干墓四字碑年深石斷字畫不全世傳以為孔子所書今此碑見存竊觀其體勢與周穆王時書吉日癸巳石刻相類其為古筆無疑謹用摹鈐以暴于世云葉氏奕苞續金石錄曰比干墓碑在汲縣漢隸釋文漢隸字源辨其繆然比干為三古殺身成仁之第一人而尼父是其族孫為之標識宜也以疑傳疑存之亦無不可洪氏曰大觀中會稽石國佐有此四字比水經又闕其三字畫清勁乃東漢威靈時人所書攷碑如歐趙皆未之見予按今存四字乃隸書決非宣聖之筆洪說當不繆也一清按漢隸釋文洪文惠公撰集即葉氏所引之文是也亦見隸續漢隸字

源乃宋樞李嬰機彥發所纂其言曰水經云朝歌縣南牧野比干冢前有石銘隸云殷大夫比干之墓今只四字復不完石公弼跋云殷比干墓四字在今衛州比干墓上世傳孔子書然隸始于秦非孔子書必矣字畫勁古當是漢人書又比干錄尚有銅盤銘十六字左林右泉後崗前道萬世之寧茲焉是寶亦是先聖古文篆曹以寧云唐開元中為耕地者所得至元延祐戊午衛輝府路學正王公悅臨摹汝帖推官張淑記之汲尹王元恕勒石是則善長所不及知也好古之士安得長存天地間哉

太和中高

祖孝文皇南巡親幸其墳而加弔焉刊石樹碑列于

墓隧矣

金石錄跋尾曰後魏孝文帝弔比干文其首已殘缺惟元戴字可識其下云歲御次乎闡

茂望舒會于星紀十有四日惟甲申抑爾雅云歲在戌曰闡茂又鄭康成注月令仲冬者日月會于星

紀後魏孝文以太和十八年十一月甲申經比干墓親為弔文樹碑而刻之是歲甲戌其說皆合其未嘗改元而稱元載者孝文以是歲遷都洛陽蓋以遷都之歲言之也又云碑陰畫紀侍從羣臣官爵姓名一清按是碑文載太師比干錄及衛輝府志文繁不錄德甫所云碑首殘缺惟元載字可識今其碑云惟皇構遷中之元載正以

電水又東南入于清水又東南

逕合城南故三會亭也以淇清合河故受名焉清水

又屈而南逕屬皇臺東北南注之也

又東入于河

謂之清口即淇河口也蓋互受其名耳地理志曰清

河水出內黃縣南

一清按漢志魏郡內黃縣清河水在南

無清水可來

所有者唯鍾是水耳蓋河徒南注清水瀆移匯流逕絕餘目尚存故東川有清河之稱相嗣不斷曹公開白溝遏水北注方復故瀆矣

沁水出上黨涅縣謁戾山

沁水即涅水也或言出穀遠縣羊頭山世靡谷三源奇注逕瀉一隍又南會三水沿歷出左右近溪參差翼注之也

南過穀遠縣東又過陟氏縣東

穀遠縣王莽之穀近也沁水又南逕陟氏縣故城東  
劉聰以詹事魯繇為冀州治此也沁水又南歷陟氏  
關又南與鵠鵠水合水出東北巨峻山乘高瀉浪觸  
石流響世人因聲以納稱西南流注于沁沁水又南  
與秦川水合水出巨峻山東帶引衆溪積以成川又  
西南逕端氏縣故城東昔韓趙魏分晉遷晉君於端  
氏縣即此是也其水南流入于沁水



又南過陽阿縣東

沁水南逕陽阿縣故城西魏土地記曰建興郡治陽阿縣郡西四十里有沁水南流沁水又南與獲澤水合水出澤城西白澗嶺下東逕獲澤墨子曰舜漁獲澤應劭曰澤在縣西北又東逕獲澤縣故城南蓋以澤氏縣也竹書紀年梁惠成王十九年晉取元武獲澤者也其水際城東注又東合清淵水水出其城北東南逕澤城東又南入于獲澤水獲澤水又東得陽

泉水口水出鹿臺山山上有水淵而不流其水東逕

陽陵城南即陽阿縣之故城也漢高帝七年封卞訢

為侯國

一清按史表作齊哀侯漢表作齊侯其石下訢封邑當屬平原之阿陽非此陽阿也詳河

水篇注

水歷嶠山東下與黑嶺水合水出西北黑嶺

下即開陞也其水東南流逕北鄉亭下又東南逕陽

陵城東南注陽泉水陽泉水又南注濩澤水又東南

又有上澗水注之水導源西北輔山東逕銅于崖南

歷析城山北山在濩澤禹貢所謂砥柱析城至于王

屋也山甚高峻上平坦下有二泉東濁西清左右不生草木數十步外多細竹其水自山陰東入獲澤水獲澤水又東南注于沁水沁水又東南陽阿水左入焉水北出陽阿川南流逕建興郡西其水又東南流逕千壁亭東而南入山沿波漱石瀕澗八丈環濤轂轉西南流入于沁水又南五十餘里沿流上下步逕栽通小竹細筍被于山渚蒙籠茂密竒為翳薈也又南出山過沁水縣北

沁水南逕石門世謂之沁口魏土地記曰河內郡野  
王縣西七十里有沁水左逕沁水城西附城東南流  
也石門是晉安平獻王司馬孚之為魏野王典農中  
郎將之所造也案其表云臣孚言臣被明詔興河內  
水利臣既到檢行沁水源出銅鞮山屈曲周迴水道  
九百里自太行以西王屋以東曾巖高峻天時霖雨  
衆谷走水小石漂迸木門朽敗稻田汎濫歲功不成  
臣輒案行去堰五里以外方石可得數萬餘枚臣以

為方石為門若天亢旱增堰進水若天霖雨陂澤充  
溢則閉石斷水空渠衍滂足以成河雲雨由人經國  
之謀暫勞永逸聖王所許願陛下特出臣表勅大司  
農府結人工勿使稽延以贊時要臣等言詔書聽許  
於是夾岸累石結以為門用代木門枋故石門舊有  
枋口之稱矣溉田頃畝之數間關歲月之功事見門  
側石銘矣水西有孔山山上石穴洞開穴內石上有  
車轍牛跡耆舊傳云自然成著非人功所就也其水

南分為二水一水南出為朱溝水沁水又逕沁水縣故城北蓋藉水以名縣矣春秋之少水也京相璠曰晉地矣又云少水今沁水也沁水又東逕沁水亭北世謂之小沁城沁水東右合小沁水水出北山臺澇淵南流為臺澇水東南入沁水沁水又東倍澇水注之北出五行之山南流注于沁水

又東過野王縣北

沁水又東邦水注之水出太行之阜山即五行之異

名也淮南子曰武王欲築宮于五行之山周公曰五行嶮固德能覆也內貢迴矣使吾暴亂則伐我難矣君子以為能持滿高誘云今太行山也在河內野王縣西北上黨關也詩所謂徒矧野王道傾蓋上黨關即此山矣其水南流逕邗城西故邗國也城南有邗臺春秋僖公二十四年王將伐鄭富辰諫曰邗武之穆也京相璠曰今野王西北三十里有故邗城邗臺是也今故城當太行南道路出其中漢武帝封李壽

金史卷九  
為侯國

一清按漢表是  
征和二年封

邗水又東南逕孔子廟東廟

廷有碑魏太和元年孔靈度等以舊宇毀落上求修  
復野王令范衆愛河內太守元真刺史咸陽公高允  
表聞立碑于廟治中劉明別駕呂次父主簿向班虎  
荀靈龜以宣尼大聖非碑頌所稱宜立記焉云仲尼  
傷道不行欲北從趙鞅聞殺鳴犢遂旋車而反及其  
後也晉人思之於太行嶺南為之立廟蓋往時迴轅  
處也余按諸子書及史籍之文並言仲尼臨河而嘆



曰丘之不濟命也夫是非太行迴轅之言也碑云魯國孔氏官于洛陽因居廟下以奉蒸嘗斯言至矣蓋孔因遷山下追思聖祖故立廟存饗耳其由劉累遷魯立堯祠於山矣非謂迴轅於此也邗水東南逕邗亭西京相璠曰又有亭在臺西南三十里今是亭在邗城東南七八里蓋京氏之謬耳或更有之余所不詳其水又南流注于沁沁水東逕野王縣故城北秦昭王四十四年白起攻太行道絕而韓之野王降始

皇拔魏東地置東郡衛元君自濮陽徙野王即此縣也漢高帝元年為殷國二年為河內郡王莽之後隊縣曰平野矣魏懷州刺史治皇都遷洛省州復郡水北有華嶽廟廟側有攢柏數百根對郭臨川負岡陰渚青青彌望奇可詵也懷州刺史頓丘李洪之所經構也廟有碑焉是河內郡功曹山陽荀靈龜以和平四年造天安元年立沁水又東朱溝枝津入焉又東與丹水合水出上黨高都縣故城東北阜下俗謂

之源源水山海經曰沁水之東有林焉名曰丹林丹  
水出焉即斯水矣丹水自原東北流又屈而東注左  
會絕水地理志曰高都縣有莞谷丹水所出東南入  
絕水是也絕水出涇氏縣西北楊谷故地理志曰楊  
谷絕水所出東南流左會長平水水出長平縣西北

小山東南流逕其縣故城

一清按魏書地形志邵郡  
皇興四年置領襄平縣即

斯縣也

涇氏之長平亭也史記曰秦使左庶長王貲攻

韓取上黨上黨民走趙趙軍長平使廉頗為將後遣

馬服君之子趙括代之秦密使武安君白起攻之括四十萬衆降起坑之於此上黨記曰長平城在郡之南秦壘在城西二軍共食流水澗相去五里秦坑趙衆收頭顱築臺於壘中因山為臺崔嵬桀起今仍號之曰白起臺城之左右沿山互陞南北五十許里東西二十餘里悉秦趙故壘遺壁舊存焉漢武帝元

朔二年以封將軍衛青為侯國

全氏曰衛將軍所封國索隱曰汝南其子

封宜春侯亦在汝南然則非上黨之長平也一清按史記秦始皇本紀五年將軍騫攻魏定酸棗燕虛長

平裴駟曰地理志汝南有長平  
縣故城在今陳州西六十里  
其水東南流注絕水

絕水又東南流逕洧氏縣故城北竹書紀年曰晉烈

公元年趙獻子城洧氏絕水東南與洧水會水導源

縣西北洧谷東流逕一故城南俗謂之都鄉城又東

南逕洧氏縣故城南世祖建武六年封萬普為侯國

而東會絕水亂流東南入高都縣右入丹水

一清按漢志丹

水入洧洧即絕也絕水南至壁王  
入沁善長分為二水與班固異

上黨記曰長平城

在郡南山中

一清按劉昭郡國志補註引上黨記曰  
白起城在郡南山中百二十里長平城

即白起城也丹水出長平北山南流秦坑趙衆流血丹川

由是俗名為丹水斯為不經矣丹水又東南流注于

丹谷即劉越石扶風歌所謂丹水者也庾林曰劉琨扶風歌曰朝

發廣莫門暮宿丹水山文選李善注引晉宮閣名曰

洛陽城廣莫門北向漢書上黨高都縣莞谷丹水所

出也蓋即酈元之說予按上黨去雒千五百里朝發

雒城暮宿高都雖有乘風之翼躡景之足不能如是

之疾且其詩曰顧瞻望宮闕寧有天井闕頭可睇德

陽殿角乎方地志宏農有丹水縣丹水出上雒冢領

山東至析入均晉書地道記曰縣有太行闕丹溪為

者斯為近之耳

闕之東谷逴自此去不復由闕矣丹水又逕二石人

北而各在一山角倚相望南為河內北曰上黨二郡  
以之分境丹水又東南歷西巖下巖下有犬泉湧發  
洪流巨輪淵深不測蘋藻冬芹竟川含綠雖嚴辰肅  
月燕麥暄萋丹水又南白水注之水出高都縣故城  
西所謂長平白水也東南流歷天井關地理志曰高  
都縣有天井關蔡邕曰太行山上有天井關在井北  
遂因名焉故劉歆遂初賦曰馳太行之嶮峻入天井  
之高關太元十五年晉征虜將軍朱序破慕容永於

太行遣軍至白水去長子一百六十里白水又東天

井溪水會焉水出天井關

一清按章懷後漢書注曰太行山上天井關南有天

井泉水

三所北流注白水世謂之北流泉水又東南流

入丹水謂之白水交丹水又東南出山逕郟城西城

在山際俗謂之期城非也司馬彪郡國志曰山陽有

郟城京相璠曰河內山陽西北六十里有郟城竹書

紀年曰梁惠成王元年趙成侯偃韓懿侯若伐我蔡

即此成也丹水又南屈而西轉光溝水出焉丹水又



西逕苑鄉城北南屈東轉逕其城南東南流注于沁  
謂之丹口竹書紀年曰晉出公五年丹水三日絕不  
流幽公九年丹水出相反擊即此水也沁水又東光  
溝水注之也水首受丹水東南流界溝水出焉又南  
入沁水又東南流逕成鄉城北又東逕中都亭南又  
合界溝水水上承光溝東南流長明溝水出焉又南  
逕中都亭西而南流注于沁水也

又東過周縣北

縣故周也

一清按水經多以州為周如武周泉周之類此是漢志河南郡之州縣而水經以為

周鄭故以縣故州也釋之後

春秋左傳隱公十有一

年周以賜鄭公孫段六國時韓宣子徙居之

何氏曰此注多

誤文公孫段事在昭公三年去隱公十一年甚遠韓起又不逮六國時且亦未嘗徙居之全氏曰周以賜鄭下有脫文蓋州本溫地蘇忿生叛王王以賜鄭而鄭不能有也晉啟南陽州入焉趙氏卻氏欒氏逆有之昭公三年晉以賜鄭公孫段七年復歸之晉而韓宣子以易原縣于宋欒大心然其後仍屬晉公家宋行人樂祁之死晉人止其尸于州以求盟是也史記韓宣子晚居州然則宣子雖不逮六國時而未始不居州也其文不見于左而見于史義門覈之未盡

有白馬溝水注之水首受

馬湖湖一名朱管陂陂上承長明溝湖水東南流逕金亭西分為二水一水東出為蔡溝一水南流注于沁也

又東過懷縣之北

韓詩外傳曰武王伐紂到邢丘更名邢丘曰懷春秋時赤翟伐晉圍懷是也王莽以為河內故河內郡治也舊三河之地矣韋昭曰河南河東河內為三河也縣北有沁陽城沁水逕其南而東注也

又東過武德縣南又東南至滎陽縣北東入于河

沁水於縣南水積為陂通結數湖有朱溝水注之其水上承沁水於沁水縣西北自枋口東南流奉溝水石出焉又東南流右泄為沙溝水也其水又東南於野王城西枝渠左出焉以周城溉東逕野王城南又屈逕其城東而北注沁水朱溝自枝渠東南逕州城南又東逕懷城南又東逕殷城北郭緣生述征記曰河之北岸河內懷縣有殷城或謂楚漢之際殷王卬

治之非也余按竹書紀年云秦師伐鄭次于懷城殷

即是城也然則殷之為名久矣知非從卬始昔劉聰

以郭默為殷州刺史都督緣河諸軍事治此

全氏曰郭默嘗

附劉曜非劉聰

朱溝水又東南注于湖湖水石納沙溝水

分朱溝南派東南逕安昌城西漢成帝河平四年封

丞相張禹為侯國

全氏曰張禹所封在汝南地理志汝南郡安昌縣下云侯國外戚恩

澤侯表亦云是汝南方輿紀要安昌城在信陽州西北七十里漢縣屬汝南郡亦見淮水注

今城

之東南有古冢時人謂之張禹墓余按漢書禹河內

軾人徙家運勺鴻嘉元年禹以老乞骸自治冢塋起  
祠堂於平陵之肥牛亭近延陵奏請之詔為徙亭哀  
帝建平二年薨遂葬于彼此則非也沙溝水又東逕  
陞城北春秋僖公二十五年取太叔於溫殺之於陞  
城是也京相璠曰在懷縣西南又逕殷城西東南流  
入于陂陂水又直武德縣南至滎陽縣北東南流入  
于河先儒亦咸謂是溝為汴渠故班固及闕駟並言  
汴水至武德入河蓋汴水枝瀆條分所在布稱亦兼

丹水之目矣

淇水出河內隆慮縣西大號山

山海經曰淇水出沮洳山水出水側頽波瀾注衝激  
橫山山上合下開可減六七十步巨石礫硤交積隍  
間傾瀾渰盪勢同雷轉激水散氛曖若霧合又東北  
沾水注之水出壺關縣東沾臺下石壁崇高昂藏隱  
天泉流發于西北隅與金谷水合金谷即沾臺之西  
溪也東北會沾水又東流注于淇淇水又逕南羅川

又歷三羅城北東北與女臺水合水發西北三女臺

下東北流注于淇

漢志上黨即壺關縣下  
沾水東至朝歌入淇

淇水又東

北逕淇陽川逕石城西北城在原上帶澗枕淇淇水

又東北西流水注之水出東大嶺下西流逕石樓南

在北陵石上練垂桀立亭亭極峻其水西流水也又

東逕馮都壘南世謂之淇陽城在西北三十里淇水

又東出山分為二水水會立石堰遏水以沃白溝左

為苑水右則淇水自元甫城東南逕朝歌縣北竹書



紀年晉定公十八年淇絕于舊衛卽此也淇水又東  
屈而西轉逕頓丘北故闕駟云頓丘在淇水南又屈

逕頓丘西爾雅曰山一成謂之頓丘釋名謂一頓而

成丘無高下大小之殺也詩所謂送子涉淇至于頓

丘者也魏徙九原西河土軍諸胡置五軍於丘側故

其名亦曰五軍也

一清按魏書地形志有南北吐京郡後徙其民于此墳有吐京之名

土軍五軍蓋

太和

一清按太和下有缺文魏書地形志頓丘郡晉武帝置頓丘縣太和

中併汲郡此必言頓丘郡縣廢置之由故有太和二字太和為魏孝文帝年號朱謀瑋僅知正其錯簡惜

不知指其  
缺失也

泉源水水有二源一水出朝歌城西北一

出東南老人晨將渡水而沈吟難濟紂問其故左右

曰老者髓不實故畏寒也紂乃於此斲脰而視髓也

其水南流東屈逕朝歌城南晉書地道記曰本沫邑

也詩云爰采唐矣沫之鄉矣殷王武丁始遷居之為

殷都也

一清按禹貢錐指曰殷本紀曰武乙復去亳徙河北此即紂都朝歌也武丁自鄴南復遷

于亳至武乙則又自亳遷于朝歌洪水注引晉書地道記謂武丁遷居沫邑蓋誤以武乙為武丁耳禹

貢紂都在冀州大陸之野即此矣

一清按此句甚費尋思蓋抄變漢書

地理志而誤者班固于鉅鹿郡鉅鹿縣下云禹貢大陸澤在北紂所作沙丘臺在東北七十里鄆氏率筆書之今尚書具在烏有是耶史記殷本紀武丁立殷復居亳徙河北蓋四世至紂不復再遷河北即朝歌也杜佑曰衛縣西二十五里有古朝歌城劉昫曰紂所都朝歌城在衛縣西今直隸大名府濬縣河南衛輝府淇縣交界之地也

有糟丘酒池之事焉有新聲靡樂號邑

朝歌晉灼曰史記樂書紂為朝歌之音朝歌者歌不時也故墨子聞之惡而迴車不逕其邑論語撰考識曰邑名朝歌顏淵不舍七十弟子掩目宰予獨顧由蹶墮車宋均曰子路患宰予顧視凶地故以足蹶之

使墮車也今城內有殷鹿臺紂昔自投於火處也竹  
書紀年曰武王親禽帝受辛于南單之臺遂分天之  
明南單之臺蓋鹿臺之異名也武王以殷之遺民封  
紂子武庚于茲邑分其地為三曰邶鄘衛使管叔蔡  
叔霍叔輔之為三監叛周討平以封康叔為衛箕子  
佯狂自悲故琴操有箕子操逕其父母之邦也不勝  
悲作麥秀歌地居河淇之間後乃屬晉戰國時皆屬  
于趙男女淫縱有紂之遺風土嶮多寇漢以虞詡為令

朋友以難治致弔詗曰不遇盤根錯節何以別利器  
乎又東與左水合謂之馬溝水水出朝歌城北東流  
南屈逕其城東又東流與美溝合水出朝歌西北大  
嶺下東出逕駱駝谷於中逶迤九十曲故俗有美溝  
之目矣歷十二崿崿流相承泉響不斷返水捍注港  
浚深隍隍間積石千通水穴萬變觀者若思不周賞  
情乏圖狀矣其水東逕朝歌城北又東南流注馬溝  
水又東南注淇水為肥泉也故衛詩曰我思肥泉茲

之永嘆毛注云同出異歸為肥泉爾雅曰歸異出同  
曰肥釋名曰本同出時所浸潤少所歸各枝散而多  
似肥者也犍為舍人曰水異出流行合同曰肥今是  
水異出同歸矣博物志謂之澳水詩云瞻彼淇澳菴  
竹猗猗毛云菴王芻也竹篇竹也漢武帝塞決河斬  
淇園之竹木以為用寇恂為河內伐竹淇川治夫百  
餘萬以益軍資今通望淇川無復此物唯王芻篇草  
不異毛興又言澳隈也鄭亦不以為津源而張司空

專以為水流入于淇非所究也然斯水即詩所謂泉源之水也故衛詩云泉源在左淇水在右衛女思歸指以為喻淇水在右蓋舉水所入為左右也

一清按  
泉源水

入淇即今衛輝府輝縣之衛河也道元詳其水而逸其名

淇水又南歷枋堰舊淇

水口東流逕黎陽縣界南入河地理志曰淇水出共東至黎陽入河溝洫志曰在遮害亭西一十八里至淇水口是也漢建安九年魏武王於水口下大枋木以成堰遏淇水東入白溝以通漕運故時人號其處

為枋頭是以盧諶征艱賦曰後背洪枋巨堰深渠高  
隄者也自後遂廢魏熙平中復通之故渠歷枋城北  
東出今瀆破故堰其堰悉鐵柱木石參用其故瀆南  
逕枋城西又南分為二水一水南注清水水流上下  
更相通注河清水盛北入故渠自此始矣一水東流  
逕枋城南東與菟口合菟水上承淇水於元甫城西  
北自石堰東菟城西屈逕其城南又東南流歷五軍  
東北得舊石洄故五水分流世號五穴口今惟通并



為二一水西注淇水謂之天井溝一水逕五軍東分  
為蓼溝東入白祀陂又南分東入同山陂溉田七十  
餘頃二陂所結即臺陰野矣苑水東南入淇水淇水  
右合宿胥故瀆瀆受河於頓丘縣遮害亭東黎山西  
北會淇水處立石堰遏水令更東北注魏武開白溝  
因宿胥故瀆而加其功也故蘇代曰決宿胥之口魏  
無虛頓丘即指是瀆也淇水又東北流謂之白溝逕  
雍榆城南春秋襄公二十三年叔孫豹救晉次于雍

榆者也淇水逕其城東東北逕同山東又北逕其城東  
東北逕帝嚳冢西世謂之頓丘臺非也皇覽曰帝嚳  
冢在東郡濮陽頓丘城南臺陰野中者也又北逕白  
祀山東歷廣陽里逕顓頊冢西俗謂之殷王陵非也  
帝王世紀曰顓頊葬東郡頓丘城南廣陽里大冢者  
是也淇水又北逕頓丘縣故城西古文尚書以為觀  
地矣蓋太康第五君之號曰五觀者也竹書紀年晉  
定公三十一年城頓丘皇覽曰頓丘者城門名頓丘

道世謂之殷皆非也蓋因丘而為名故曰頓丘矣淇水東北逕枉人山東牽城西春秋左傳定公十四年公會齊侯衛侯于牽者也杜預曰黎陽東北有牽城即此城矣淇水又東北逕石柱岡東北注矣

又東過內黃縣南為白溝

淇水又東北逕并陽城西世謂之辟陽城非也即郡國志所謂內黃縣有并陽聚者也白溝又北左合蕩水又東北流逕內黃縣故城南縣右對黃澤郡國志

曰縣有黃澤者也地理風俗記曰陳留有外黃故加  
內史記曰趙廉頗伐魏取黃即此縣

屈從縣東北與洹水合

白溝自縣北逕戲陽城東世謂之義陽郭

一清按後漢書光武

帝紀幸內黃大破五校於蓊陽降之章懷註云蓊陽

聚名屬魏郡左傳云晉荀盈如齊逆女還卒於戲陽

杜預註云內黃縣北有戲陽城戲與蓊同義陽郭當

作蓊陽聚說文蓊字下云墨翟書義从弗魏郡有蓊  
陽鄉讀若錡則蓊與義字可通用也春秋昭公十年

沈氏曰是九年

晉荀盈如

齊逆女還卒戲陽是也白溝又北逕高城亭又東洹

水從西南來注之又北逕問亭東即魏界也魏縣故城應劭曰魏武侯之別都也城內有武侯臺王莽之魏城亭也左與新河合洹水枝流也白溝又東北逕銅馬城西蓋光武征銅馬所築也故城得其名矣白溝又東北逕羅勒城東又東北漳水注之謂之利漕口自下清漳白溝淇河咸得通稱也

又東北過館陶縣北又北過清淵縣西

白溝水又東北逕趙城西又北阿難河出焉蓋魏將

阿難所導

一清按元和志云魏將李阿難

以利衡瀆首有阿難之稱

矣白溝又東北逕空陵城西又北逕喬亭城西東去

館陶縣故城十五里縣即春秋所謂冠氏也魏陽平

郡治也淇水又屈逕其縣北又東北逕平恩縣故城

東地理風俗記曰縣故館陶之別鄉也漢宣帝元康

三年置以封后父許伯為侯國

沈氏曰是地節三年封一清按宣帝地節

四年改明年元為元康廣漢以神爵元年病死無子絕元帝初元元年紹封弟子嘉伯即廣漢也地

理志王莽之延平縣矣淇水又東過清淵縣故城西

又歷縣之西北為清淵故縣有清淵之名矣

一清按漢志魏

郡清淵縣應劭曰清河在西北

世謂之魚池城非也淇水又東北逕

榆陽城北

漢昭帝封太常江德為侯國文穎曰邑在

魏郡清淵

一清按褚表作潦陽小司馬曰表在清河漢表作輶陽侯江喜地理志清河無潦陽

或是魏郡清淵縣又褚表江德以捕淮陽反者公孫勇侯是武帝非昭帝

世謂之清淵城

非

又東北過廣宗縣東為清河

清河東北逕廣宗縣故城南順帝永元五年封皇太

子萬年為王國

沈氏曰范史章八王少子廣宗殤王萬歲以和帝永元五年封注未覈

田融言趙立建興郡於城內置臨清縣於水東自趙

石始也清河之右有李雲墓雲字行祖甘陵人好學

善陰陽舉孝廉遷白馬令中常侍單超等立掖庭民

女亳氏為后后家封者四人賞賜巨萬雲上書移副

三府曰孔子云帝者諦也今尺一拜用不經御省是

帝欲不諦乎帝怒下獄殺之後冀州刺史賈琮使行

部過祠雲墓刻石表之令石柱尚存俗猶謂之李氏



石柱清河又東北逕界城亭東水上有大梁謂之界  
城橋英雄記曰公孫瓚擊青州黃巾賊大破之還屯  
廣宗袁本初自往征瓚合戰於界橋南二十里紹將  
鞠義破瓚於界城橋斬瓚冀州刺史嚴綱又破瓚殿兵  
於橋上即此梁也世謂之鬲城橋蓋傳呼失實矣清  
河又東北逕信鄉縣故城西地理風俗記曰甘陵西  
北十七里有信鄉故縣也清河又東北逕信成縣故  
城西應劭曰甘陵西北五十里有信成亭故縣也趙

置水東縣於此城故亦曰水東城清河又東北逕清

陽縣故城西漢高祖置清河郡治此中二年

沈氏曰本表是

三年景帝封皇子乘為王國王莽之平河也漢光武建

武二年西河鮮于冀為清河太守作公廨未就而亡

後守趙高計功用二百萬五官黃秉功曹劉適言四

百萬錢於是冀乃鬼見白日道從入府與高及秉等

對共計校定為通東所割匿冀乃書表自理其畧言

高貴不尚節

一清按太平廣記引水經作貴尚小節

畝壘之夫而箕踞

遺類研密失機婢妾其信媚世求顯偷竊銀艾鄙辱

天官

一清按太平廣記引水經作偷竊很鄙有辱天官

易譏負乘誠高之謂

臣不勝鬼言謹因千里驛聞付高上之便西北去三

十里車馬皆滅不復見秉等皆伏地物故高以狀聞

詔下還冀西河田宅妻子焉兼為差代以旌

一清按太平廣

記引水經作弭

幽中之訟漢桓帝建和元年

沈氏曰是三年

改清河

為甘陵王國以王妖言徙其年立甘陵郡治此焉

又東北過東武城縣西

清河又東北逕陵鄉西應劭曰東武城西南七十里  
有陵鄉故縣也後漢封太僕梁松為侯國故世謂之  
梁侯城遂立侯城縣治也清河又東北逕東武城縣  
故城西史記趙公子勝號平原君以解邯鄲之功受  
封於此定襄有武城故加東矣清河又東北逕復陽

縣故城西

漢高祖七年封右司馬陳胥為侯國

一清按陳

胥所封索隱曰是南陽地理志南陽郡復陽縣侯國  
然清河郡亦有復陽縣一清按方輿紀要復陽城在  
棗強縣西南十八里漢縣屬清河郡後漢時省陸澄  
曰為枯絳水所湮此即陳胥之封邑非南陽之復陽

也南陽之復陽關駟曰故湖陽之樂鄉元帝元  
延二年置安得以為陳胥封邑小司馬誤矣 王莽

更名之曰樂歲地理風俗記曰東武城西北三十里  
有復陽亭故縣也世名之曰檻城非也清河水又東  
北流逕棗彊縣故城西史記建元以來王子侯者年  
表云漢武帝元朔二年封廣川惠王子晏為侯國也  
應劭地理風俗記曰東武城西北五十里有棗彊城  
故縣也

又北過廣川縣東

清河北逕廣川縣故城南闕駟曰縣中有長河為流  
故曰廣川也水側有羌壘姚氏之故居也今廣川縣  
治清河又東北逕歷縣故城南地理志信都之屬縣  
也王莽更名曰歷寧也應劭曰廣川縣西北三十里  
有歷城亭故縣也今亭在縣東如北水濟尚謂之為  
歷口渡也

又東過脩縣南又東北過東光縣西

清河又東北左與張甲屯絳故瀆合阻深隄高障無

復有水矣又逕脩縣故城南屈逕其城東脩音條

氏全

曰三字  
注中注

王莽更名之曰脩治郡國志曰故屬信都清

河又東北左與橫漳枝津故瀆合又東北逕脩國

清一

按脩是縣名非國  
名也道元誤矣

故城東漢武帝封周亞夫為侯國

故世謂之北脩城也清河又東北逕郾閤城東城臨

側清河晉脩縣治城內有縣長魯國孔明碑清河又

東至東光縣西南逕胡蘇亭

劉昭郡國志補注曰東  
光有胡蘇亭胡蘇河之

名見  
爾雅

者是

一清二字上  
下有脫誤

世謂之羌城非也又東北右

會大河故瀆又逕東光縣故城西後漢封耿純為侯國初平二年黃巾三十萬入渤海公孫瓚破之於東光界追奔是水斬首三萬流血井水即是水也

又東北過南皮縣西

清河又東北無棣溝出焉東逕南皮縣故城南又東逕樂亭北地理志之臨樂縣故城也王莽更名樂亭晉書地道志太原地記樂陵國有新樂縣即此城矣又東逕新鄉城北即地理志高樂故城也王莽更之



曰為鄉矣無棣溝又東分為二瀆無棣溝又東逕樂

陵郡北又東屈而北出又東轉逕苑鄉縣故城南

清一

按此縣名不見兩漢  
晉魏史志未詳處所

又東南逕高成縣故城南與枝

瀆合瀆上承無棣溝南逕樂陵郡西又東南逕千童

縣故城東史記建元以來王子侯者年表曰故重也

一作千鐘漢武帝元朔四年封河閼獻王子劉陰為

侯國應劭曰漢靈帝改曰饒安也

一清按史表千鐘  
侯劉搖一云劉陰

索隱曰一作重漢表作重侯擔在平原地理志有重  
丘也若渤海之千童別是一縣漢志注應劭曰靈帝

改曰饒安者也  
道元混而一之

滄州治枝瀆又南東屈東北注無棣

溝無棣溝又東北逕一故城北世謂之功城也又東

北逕鹽山東北入海春秋僖公齊楚之盟於召陵也

管仲曰昔召康公賜我先君太公履北至于無棣蓋

四履之所也京相璠曰舊說無棣在遼西孤竹縣二

說參差未知所定然管仲以責楚無棣在此方之為

近既世傳以久且以聞見書之清河又東北逕南皮

縣故城西十三州志曰章武有北皮亭故此曰南皮

也王莽之迎河亭史記惠景侯者年表云漢文帝後

元年中封考文后兄子彭祖侯國

一清按史漢表實彭祖與竇廣國皆

以景帝後七年封非文帝也又文景改年只稱後元  
年後二年中元年中二年耳則亦不當云後元年中  
也後元非紀年之號此襲史表而誤者也他處漢建  
引史有年數者皆據史改正而特存其說于此

安中魏武擒袁譚於此城也清河又逕北皮城東左

會濞池別瀆謂之口故謂之合城也地理風俗記曰

南皮城北五十里有北皮城也

又東北過浮陽縣西

清河東北浮水故瀆出焉按史記趙之南界有浮水  
焉浮水在南而此有浮陽之稱者蓋浮水出入津流  
同逆混并清漳二瀆河之舊道浮水故迹又自斯別  
是縣有浮陽之名也首受清河於縣界東北逕高成  
縣之苑鄉城北又東逕章武縣之故城北漢文帝後

元中

一清按此注  
誤文說見前

封孝文后弟實廣國為侯國王莽

更名桓章晉太始中立章武郡治此浮水故瀆又東  
逕篋山北魏土地記曰高成東北五十里有篋山長

七里浮瀆又東北逕柳縣故城南漢武帝元朔四年

封齊孝王子劉陽為侯國地理風俗記曰高成縣東

北五十里有柳亭故縣也世謂之辟亭非也浮瀆又

東北逕漢武帝望海臺

一清按統志武帝臺在鹽山縣東北七十里水經浮浮水

所經蓋南臺也下章武縣臺乃是北臺耳

又東注于海應劭曰浮陽浮水

所出入海潮汐往來日再今溝無復有水也清河又

北分為二瀆枝分東出又謂之浮瀆清河又北逕浮

陽縣故城西王莽之浮城也建武十五年更封驍騎

將軍平鄉侯劉歆為侯國浮陽郡治又東北濔沱別  
瀆注焉謂之合口也

又東北過濊邑北

濊水出焉

又東北過鄉邑南

清河又東分為二水枝津右出焉東逕漢武帝故臺

北魏土地記曰章武縣東一百里有武帝臺南北有

二臺相去六十里基高六十丈俗云漢武帝東巡海

上所築又東注于海清河又東北逕紵姑邑南俗謂之新城非也

又東北過窮河邑南

清河又東北逕窮河邑南俗謂之三女城非也東北至泉周縣北入滹沱水經曰笥溝至泉周縣東南與清河合者目為清河下邑也又東泉周水出焉

又東北過漂榆邑入于海

清河又東逕漂榆邑故城南俗謂之角飛城趙記云

石勒使王述煮鹽於角飛即城異名矣魏土地記曰  
高城縣東北一百里北盡漂榆東臨巨海民咸煮海  
水籍鹽為業即此城也清河自是入于海

蕩水出河內蕩陰縣西山東

何氏曰蕩廣  
韵作蕩从竹

蕩水出縣西石尚山東流逕其縣故城南縣因水以

取名也晉伐成都王穎敗帝于是水之南盧緄四王  
起事曰惠帝征成都王穎戰敗時舉輦司馬八人輦  
猶在肩上軍人競就殺舉輦者乘輿頓地帝傷三矢



百僚奔散唯侍中嵇紹扶帝士將兵之帝曰吾吏也  
勿害之衆曰受太弟命唯不犯陛下一人耳遂斬之  
血汙帝袂將洗之帝曰嵇侍中血勿洗也此則嵇延  
祖殞命之所

又東北至內黃縣入于黃澤

羗水出蕩陰西北韓大牛泉地理志曰縣之西山羗  
水所出也羗水又東逕韓附壁北又東流逕羗城北  
故羗里也史記音義曰牖里在蕩陰縣廣雅牖獄犴

也夏曰夏臺殷曰羗里周曰囿圖皆國土昔殷紂納崇侯虎之言囚西伯於此散宜生南宮括見文王乃演易用明否泰始終之義焉羗城北水積成淵方一十餘步深一丈餘東至內黃與防水會水出西山馬頭澗東逕防城北盧湛征艱賦所謂越防者也其水東南流注于羗水又東歷黃澤入蕩水地理志曰羗水至內黃入蕩者也蕩水又東與長沙溝水合其水導源黑山北谷東流逕晉鄙故壘北謂之晉鄙城名

之為魏將城昔魏公子無忌矯奪晉鄙軍於是處故  
班叔皮遊居賦曰過蕩陰而弔晉鄙責公子之不臣  
者也其水又東謂之宜師溝又東逕蕩陰縣南又東  
逕枉人山東北至內黃縣右入蕩水亦謂之黃雀溝  
是水秋夏則泛春冬則耗其水又東逕內黃城南陳  
留外黃故稱內也東注白溝

### 洹水出上黨洹氏縣

水出洹山山在長子縣也

東過隆慮縣北

縣北有隆慮山昔帛仲理之所遊神也縣因山以取名漢高帝六年封周竈為侯國應劭曰殤帝曰隆故改從林也縣有黃華水出於神囷之山黃華谷北崖上高十七里水出木門帶帶即山之第三級也去地七里縣水東南注壑直瀉巖下狀若雞翹故謂之雞翹洪蓋亦天台赤城之流也其水東流至谷口潛入地下東北一十里復出名柳渚渚周四五里是黃華

水重源再發也東流葦泉水注之水出林慮山北澤中東南流與雙泉合水出魯船門東下流入葦泉水葦泉水又東南流注黃華水謂之陵陽水又東入于

洹水也

虞氏世南北堂書鈔引水經注曰黃華谷內西洪邊有一洞深數丈去地千餘仞俗謂之

聖人穴太平寰宇記引水經注云黃華谷西北有洞穴謂之聖水窟今本無之

又東北出山過鄴縣南

洹水出山東逕殷墟北竹書紀年曰盤庚即位自奄遷于北蒙曰殷昔者項羽與章邯盟於此地矣洹水

又東枝津出焉東北流逕鄴城南謂之新河又東分  
為二水北水逕東明觀下昔慕容儁夢石虎齧其臂  
寤而惡之購求其尸而莫知之後宮嬖妾言虎葬東  
明觀下於是掘焉下度三泉得其棺剖棺出尸尸僵  
不腐儁罵之曰死胡安敢夢生天子也使御史中尉  
陽約數其罪而鞭之此蓋虎始葬處也又北逕建春  
門石梁不高大治石工密舊橋首夾建兩石柱螭矩  
趺勒甚佳乘輿南幸以其作制華妙致之平城東側

西闕北對射堂淥水平潭碧林側浦可遊憩矣淇水

際其西逕魏武元武故苑苑舊有元武池以肄舟楫

有魚梁釣臺竹木灌叢今池林絕滅畧無遺跡矣其

水西流注于漳南水又東北逕女亭城北又東北逕

高陵城南東合垆溝又東逕鸛鵲陂陂黃衣水注之北

與台陂水合陂東西三十里南北

一清桮下有脫文

注白溝

河溝上承洹水北絕新河北逕高陵城東又北逕斥

丘縣故城西縣西南角有斥丘蓋因丘以氏縣故乾

侯矣春秋經書昭公二十八年公如晉次于乾侯也  
漢高帝六年封唐厲為侯國王恭之利丘矣又屈逕  
其城北東北流注于白溝洹水自鄴東逕安陽縣故  
城北徐廣晉紀曰石遵自李城北入斬張豺于安陽  
是也魏土地記曰鄴城南四十里有安陽城城北有  
洹水東流者也洹水又東至長樂縣左側白溝出焉  
洹水又東逕長樂縣故城南按晉書地理志曰魏郡  
有長樂縣也



又東過內黃縣北東入于白溝

洹水逕內黃縣北東流注于白溝世謂之洹水也許

慎說文呂忱字林並云洹水出晉魯之間

一清按俗本說文作

齊魯之間當以此注正之

昔聲伯夢涉洹水或與其瓊瓌而食之

泣而又與瓊瓌盈其懷矣從而歌曰濟洹之水贈我  
以瓊瓌歸乎歸乎瓊瓌盈乎懷乎後言之之暮而卒  
即是水也

水經注釋卷九

欽定四庫全書

水經注釋卷十

仁和趙一清撰

濁漳水

清漳水

補

滏水

補

洺水

濁漳水出上黨長子縣西發鳩山

漳水出鹿谷山與發鳩連麓而在南淮南子謂之發  
苞山故異名互見也左則陽泉水注之右則散蓋水  
入焉三源同出一山但以南北為別耳

東過其縣南

又東堯水自西山東北流逕堯廟北又東逕長子縣故城南周史辛甲所封邑也春秋襄公十八年晉人執衛行人石賈於長子即是縣也秦置上黨郡治此也其水東北流入漳水漳水東會于梁水梁水南出梁山北流逕長子縣故城南竹書紀年曰梁惠成王十二年鄭取屯留尚子湮尚子即長子之異名也梁水又北入漳水

屈從縣東北流

陶水南出陶鄉北流逕長子城東西轉逕其城北東注于漳水

又東過壺關縣北

漳水東逕屯留縣南又屈逕其城東東北流有絳水注之絳水西出穀遠縣東之發鳩谷又有一水西出穀遠縣為濫水也東逕屯留縣故城南故留吁國也潞氏之屬春秋襄公十八年晉人執孫蒯於純留是

也其水東北流入于漳故桑欽云絳水出屯留西南

東入漳

禹貢錐指曰宋張垧云降水即濁漳也字或作絳地理志上黨郡屯留縣下云桑欽言絳

水出西南東入海酈道元引此文作入漳一清按後鉅鹿縣下引地理志信都國信都縣下班固原文云入海則此漳字明是道元所改也觀其自相詰難知之以絳水為入漳絳漬為入海然絳漬自是漳水一時之徒流非禹貢之絳水蓋班志之誤道元未敢頌言之漳水又東凍水注之水

西出發鳩山東逕余吾縣故城南漢光武建武六年

封景丹子尚為侯國凍水又東逕屯留縣故城北竹

書紀年梁惠成王元年韓共侯趙成侯遷晉桓公于

屯留史記趙肅侯奪晉君端氏而徙居之此矣其水  
又東流注于漳故許慎曰水出發鳩山入河從水東  
聲也漳水又東北逕壺關縣故城西又屈逕其城北  
故黎國也有黎亭縣有壺口關故曰壺關矣呂后元  
年立孝惠後宮子武為侯國漢有壺關三老公乘興

庖林曰漢書庾太子傳作壺關三老茂顏師古曰荀  
悅漢紀作令狐茂今漢紀無而白帖引上黨郡記曰  
漢史稱壺關三老令狐茂然漢武故事曰壺關三老  
鄭茂上書未知誰信又漢書王尊傳有胡三老公乘  
興上書訟王尊治京兆功效善長以茂為興大誤一  
清按王伯厚曰今漢紀脫令狐茂三字又御覽引上

黨郡記令狐徵君隱  
城東山中疑即茂也

上書訟衛太子即邑人也縣在

屯留東不得先壺關而後屯留也漳水歷鹿臺山與

銅鞮水合水出銅鞮縣西北石磴山

一清按太平寰宇記銅鞮縣下

引水經注云銅鞮水出覆釜山經襄垣縣道又石梯山下引水經注云銅鞮縣有石梯山高一千九百尺今本無之魏書地形志鄉郡銅鞮縣有銅鞮城石梯水東行入漳然則銅鞮水即石梯水而石梯山亦疑即石磴山也東流與專池水合水出八特山東北流入銅

鞮水銅鞮水又東南逕女

一清按下有脫文

諫水西北出好

松山

一清按太平寰宇記上黨縣有八諫水引水經云諫水源出上黨縣西魏書地形志上黨郡寄



氏縣有八禮泉上  
黨谷即八諫水也

東南流北則葦池水與公主水合

而右注之南則榆交水與皇后水合而左入焉亂流

東南注于銅鞮水銅鞮水東逕李憲墓前有碑碑石

破碎故李氏以太和元年立之其水又東逕故城北

城在山阜之上下臨岫壑東西北三面岨袤二里世

謂之斷梁城即故縣之上虎亭也銅鞮水東東逕銅

鞮縣故城北城在水南山中晉大夫羊舌赤銅鞮伯

華之邑也漢高祖破韓王信於此縣也銅鞮水又東

南流逕傾城西即縣之下虎聚也地理志曰縣有上虎亭下虎聚者也銅鞮水又南逕胡邑西又東屈逕其城南又東逕襄垣縣入于漳漳水又東北流逕襄垣縣故城南王莽之上黨亭

又東北過屯留縣南潞縣北

縣故赤翟潞子國也其相鄩舒有傷才而不以茂德  
晉伯宗數其五罪使荀林父滅之關駟曰有潞水為  
冀州浸即漳水也余按燕書王猛與慕容評相遇於

潞川也評郭固山泉鬻水與軍入絹匹水二石無佗  
大川可以為浸所有巨浪長湍唯漳水耳故世人亦  
謂濁漳為潞水矣縣北對故臺壁漳水逕其南本路  
子所立也世名之為臺壁也慕容垂伐慕容永於長  
子軍次潞川永率精兵拒戰阻河自固垂陣臺壁一  
戰破之即是處也漳水於是左合黃須水口水出臺  
壁西張諱巖下世傳巖赤則土離兵害故惡其變化  
無常恒以石粉汚之令白是以俗目之為張諱巖其

水南流逕臺壁西又南入于漳漳水又東北歷望夫  
山山之南有石人竚於山上狀有懷於雲表因以名  
焉有湮水西出覆甌山而東流與西湯溪水合水出  
湮縣西山湯谷五泉俱會謂之五會之泉交東南流  
謂之西湯水又東南流注湮水又東逕湮氏縣故城  
南縣氏湮水也東與白鷄水合水出縣之西山東逕  
其縣北東南流入湮水又湮水東南武鄉水會焉水  
源出武鄉山西南逕武鄉縣故城西而南得清谷口

水源出東北長山清谷西南與鞞谿白壁二水合南  
入武鄉水又南得黃水口黃水三源同注一壑東南  
流與隱室水合水源西北出隱室山東南注黃水又  
東入武鄉水武鄉水又東南注于湟水湟水又東南  
流注于漳水漳水又東逕礪陽城北倉谷水入焉水  
出林慮縣之倉谷溪東北逕魯般門西闕昂藏石壁  
霞舉左右結石修防崇基仍存北逕偏橋東即林慮  
之嶠嶺抱犢固也石磴西陞陟踵修上五里餘嶠路

中斷四五丈中以木為偏橋劣得通行亦言故有偏  
橋之名矣自上猶須攀蘿捫葛方乃自臻山頂即庾  
袞眩墜處也倉谷溪水北合白木溪溪水出壺關縣  
東白木川東逕百畝城北蓋同仇池百頃之稱矣又  
東逕林慮縣之石門谷又注于倉溪水倉溪水又北  
逕礪陽城東而北流注于漳水漳水又東逕葛公亭  
北而東去矣

又東過武安縣南

漳水於縣東清漳水自涉縣東南來流注之世謂決

入之所為交漳口也

全氏曰按地理志則是濁漳入清漳清漳入河不如酈言杜君

卿曰清漳今為濁漳所奪李弘憲曰清不勝濁故也

### 又東出山過鄴縣西

漳水又東逕三戶峽為三戶津張晏曰三戶地名也

在梁期西南孟康曰津峽名也在鄴西四十里

一清按裴

駟史記集解引張說梁期作梁淇引孟說四十里作三十里詳見下

又東汙水注之水

出武安縣山東南流逕汙城北昔項羽與蒲將軍英

布濟自三戶破章邯于是水汙水東注于漳水漳水

又東逕武城南世謂之梁期城梁期在鄴北俗亦謂

之兩期城皆為非也司馬彪郡國志曰鄴縣有武城

武城即期城矣

一清按梁期城在鄴北而三戶津在鄴西漳水先逕武城而後梁期武城

一名期城與梁期地望相近善長故以俗傳為非矣

漳水又東北逕西門豹祠

前祠東側有碑隱起為字祠堂東頭石柱勒銘曰趙

建武中所修也魏文帝述征賦曰羨西門之嘉迹忽

遙睇其靈宇漳水右與枝水合

全氏曰漢志魏郡武始縣漳水東至邯鄲



入漳指此水也然漳水入漳其說不甚分明當其水如張晏所云漳水之別注云枝水蓋本之晏也

上承漳水於邯鄲西而東別與邯水合水發源邯山東北逕邯鄲縣故城西北注漳水故曰邯鄲也張晏曰漳水之別自城西南與邯山之水會今城旁猶有溝渠存焉漢武帝元朔二年封趙敬肅王子劉仁為侯國其水又東北入于漳昔魏文侯以西門豹為鄴令也引漳以溉鄴民賴其用其後至魏襄王以史起為鄴令又堰漳水以灌鄴田咸成沃壤百姓歌之魏

武王又竭漳水迴流東注號天井堰二十里中作十二  
二澄澄相去三百步令互相灌注一源分為十二流  
皆懸水門陸氏鄴中記云水所溉之處名曰晏陂澤  
故左思之賦魏都也謂澄流十二同源異口者也魏  
武之攻鄴也引漳水以圍之獻帝春秋曰司空鄴城  
圍周四十里初淺而狹如或可越審配不出爭利望  
而笑之司空一夜增修廣深二丈引漳水以注之遂  
拔鄴本齊桓公所置也故管子曰築五鹿中年鄴以

衛諸夏也後屬晉魏文侯七年始封此地故曰魏也

一清按左傳閔公元年晉侯賜畢萬魏以為大夫卜偃曰魏大名也史記魏世家晉獻帝之十六年也文侯都是桓子之孫蓋畢萬之後索隱曰系本桓子生文侯斯其傳云孺子湏是魏駒之子與此系代亦不同也今注文侯始封此地獨漢高帝十二年置魏不記詩之魏風乎蓋誤證也

郡治鄴縣王莽更名魏城後分魏郡置東西部都尉故曰三魏魏武又以郡國之舊引漳流自城西東入逕銅雀臺下伏流入城東注謂之長明溝也渠水又南逕止車門下魏武封於鄴為北宮宮有文昌殿溝

水南北夾道枝流引灌所在通溉東出石竇堰下注  
之洹水故魏武登臺賦曰引長明灌街里謂此渠也  
石氏於文昌故殿處造東西太武二殿於濟北穀城  
之山採文石為基一基下五百武直宿衛屈柱跌瓦  
悉鑄銅為之金漆圖飾焉又徙長安洛陽銅人置諸  
宮前以華國也城之西北有三臺皆因城為之基魏  
然崇舉其高若山建安十五年魏武所起平垣略盡  
春秋古地云葵邱地名今鄴西三臺是也謂臺已平

或更有見意所未詳中曰銅雀臺高十丈有屋百餘間臺成命諸子登之並使為賦陳思王下筆成章美捷當時亦魏武望奉常王叔治之處也昔嚴才與其屬攻掖門脩聞變車馬未至便將官屬步至宮門太祖在銅雀臺望見之曰彼來者必王叔治也相國鍾繇曰舊京城有變九卿各居其府卿何來也脩曰食其祿焉避其難居府雖舊非赴難之義時人以為美談矣其後石虎更增二丈立一屋連棟接檁彌覆其

上盤迴隔之名曰命子窟又於屋上起五層樓高十  
五丈去地二十七丈又作銅雀於樓嶺舒翼若飛南  
則金虎臺高八丈有屋一百九間北曰水井臺亦高  
八丈有屋一百四十間上有冰室室有數井井深十  
五丈藏冰及石墨馬石墨可書又然之難盡亦謂之  
石炭又有粟窖及監窖以脩不虞今窖上猶有石銘  
存焉左思魏都賦曰三臺列峙而崢嶸者也城有七  
門南曰鳳陽門中曰中陽門次曰廣陽門東曰建春

門北曰廣德門次曰廐門西曰金明門一曰白門鳳  
陽門三臺洞開高三十五丈石氏作層觀架其置銅  
鳳頭高一丈六尺東城上石氏立東明觀觀上加金  
博山謂之鏘天北城上有齊斗樓超出羣榭孤高特  
立其城東西七里南北五里飾表以磚百步一樓凡  
諸宮殿門臺隅雉皆加觀榭層甍反宇飛檐拂雲圖  
以丹青色以輕素當其全盛之時去鄴六七十里遠  
望若亭巍若仙居魏因漢祚復都洛陽以譙為先人

本國許昌為漢之所居長安為西京之遺跡鄴為王  
業之本基故號五都也今相州刺史及魏郡治漳水  
自西門豹祠北逕趙閱馬臺西基高五丈列觀其上  
石虎每講武於其下升觀以望之虎自於臺上放鳴  
鏑之矢以為軍騎出入之節矣漳水又北逕祭陌西  
戰國之世俗巫為河伯取婦祭於此陌魏文侯時西  
門豹為鄴令約諸三老曰為河伯取婦幸來告知吾  
欲送女皆曰諾至時三老迂掾賦斂百姓取錢百萬



巫覡行里中有好女者呪當為河伯婦以錢三萬聘  
女沐浴脂粉如嫁狀豹往會之三老巫掾與民咸集  
赴觀巫嫗年七十從十女弟子豹呼婦視之以為非  
妙令巫嫗入報河伯投巫于河中有頃曰何久也又  
令三弟子及三老入白並投於河豹磬折曰三老不  
來奈何復欲使迂掾豪長趣之皆叩頭流血乞不為  
河伯取婦淫祀雖斷地留祭陌之稱焉又慕容儁投  
石虎尸處也田融以為紫陌也趙建武十一年造紫

陌浮橋於水上為佛圖澄先造生墓於紫陌建武十

五年卒十二月葬焉即此處也漳水又

一清按鄴中記曰鄴城西

三里桑梓苑有宮臨漳水又下疑洛南字

對趙氏臨漳宮宮在桑梓苑多

桑木故苑有其名三月三日及始蠶之月虎帥皇后

及夫人採桑於此今地有遺桑墉無尺雉矣漳水又

北濫水入焉漳水又東逕梁期城南地理風俗記曰

鄴北五十里有梁期城故縣也

一清按史記項籍本紀注引張晏說作梁

淇索隱曰淇當作湛晉八王故事云王浚伐鄴前至梁湛蓋梁湛在鄴西四十里關駟十三州志云鄴北

五十里梁期城故漢武帝元鼎五年封任破胡為侯縣也蓋本之應劭

國晉惠帝永興元年驃騎王浚遣烏丸渴末逕至梁期侯騎到鄴成都王穎遣將軍石超討末為末所敗於此又逕平陽城北竹書紀年曰梁惠成王元年鄴師敗邯鄲之師于平陽者也司馬彪郡國志曰鄴有平陽城即此地也

又東過列人縣南

漳水又東右逕斥邱縣北即裴縣故城南王莽更名

之為列治也竹書紀年曰梁惠成王八年惠成王伐  
邯鄲取列人者也於縣右合白渠故瀆白渠水出魏  
郡安武縣欽口山東南流逕邯鄲縣南又東與拘澗  
水合水導源武始東山入白渠北俗猶謂是水為拘  
河也白渠水又東又有牛首水入焉水出邯鄲縣西  
堵山東流分為二水洪湍雙逝澄映兩川漢景帝時  
六國悖逆命曲周侯酈寄攻趙圍邯鄲相捍七日  
漢書  
趙幽王友酈商二傳  
俱作七月此文誤也引牛首拘水灌城城壞王自殺

其水東入邯鄲城逕溫明殿南漢世祖擒王郎幸邯  
鄲畫卧處也其水又東逕叢臺南六國時趙王之臺  
也郡國志曰邯鄲有叢臺故劉劭趙都賦曰結雲閣  
於南宇立叢臺於少陽者也今遺基舊墉尚在其水  
又東歷邯鄲阜張晏所謂邯山在東城下者也曰單  
盡也城郭從邑故加邑邯鄲之名蓋指此以立稱矣  
故趙郡治也長沙耆舊傳稱桓楫為趙郡太守嘗有  
遺囊粟於路者行人掛囊粟於樹莫敢取之即於是

處也其水又東流出城又合成一川也又東澄而為

渚沁水

全氏曰顧景范曰今城南五里有渚河城西半里有沁河合流為西河蓋是二水名

東

南流注拘澗水

漢志魏郡武始拘澗水東北至邯鄲入白渠

又東入白渠

漢志趙國邯鄲縣堵山牛首水所出東入白渠

又東故瀆出焉一水東為澤

渚曲梁縣之雞澤也國語所謂雞邱矣東北通澄湖

白渠故瀆南出所在枝分右出即邯溝也歷邯溝縣

故城東蓋因溝以氏縣也地理風俗記曰即裴城西

北二十里有邯溝城故縣也又東逕肥鄉縣故城北

竹書紀年曰梁惠成王八年代邯鄲取肥者也晉書  
地道記曰太康中立以隸廣平也渠道交徑互相纏  
縻與白渠同歸逕列人右會漳津今無水地理志曰  
白渠東至列人入漳是也

又東北過斥漳縣南

應劭曰其國斥鹵故曰斥漳漢獻帝建安十八年魏  
太祖鑿渠引漳水東入清洹以通河漕名曰利漕渠  
漳津故瀆水舊斷溪東北出涓流濊注而已尚書所

謂覃懷底績至于衡漳者也孔安國曰衡橫也言漳  
水橫流也又東北逕平恩縣故城西應劭曰縣故館  
陶之別鄉漢宣帝元康三年置以封后父許伯為侯  
國一清按許伯封已見淇水篇館陶縣下注此複出是地節三年王莽更曰延平也

又東北過曲周縣東又東北過鉅鹿縣東

衡漳故瀆東北逕南曲縣故城西地理志廣平有南  
曲縣應劭曰平恩縣北四十里有南曲亭故縣也又  
逕曲周縣故城東地理志曰漢武帝建元四年置王



莽更名直周余按史記大將軍酈商以高祖六年封

曲周縣為侯國又考漢書同

全氏曰五字注中注

是知曲周舊

縣非始孝武蓋商

孫氏潛曰蓋商下有缺文下文注云冀州人在縣市補履數十年云

云是列仙傳嘯父事非酈商也

冀州人在縣市補履數十年人奇其

不老求其術而不能得也衡漳又北逕巨橋抵閣西

舊有大梁衡水故有巨橋之稱昔武王伐紂發巨橋

之粟以賑殷之饑民服虔曰巨橋倉名許慎曰鉅鹿

水之大橋也今臨側水湄左右方一二里中狀若邱

墟蓋遺囑故窖處也衡水又北逕鉅鹿縣故城東應劭曰鹿者林之大者也尚書曰堯將禪舜納之大麓之野烈風雷雨不迷致之以昭華之玉而縣取目焉

一清按此是緯書

路溫舒縣之東里人父為里監門使溫舒牧羊澤中取蒲牒用寫書即此澤也鉅鹿郡治秦始皇

皇二十五年滅趙以為鉅鹿郡漢景帝中元年為廣平郡武帝征和三年以封趙敬肅王子為廣平侯國一清按漢志鉅鹿郡秦置又廣平國武帝征和二年置為平于國宣帝五鳳二年復故莽曰富昌蓋郡國

並列不得如酈所言又沈氏曰敬肅王子偃以征和  
二年立為平于王即廣平也然是王國非侯國善長  
又世祖中興更為鉅鹿也一清按續志鉅鹿郡劉昭補注云建武十三年省廣

平國以其縣屬非更廣平為鉅鹿也或曰為乃屬字之誤鄭元注尚書引地說云

大河東北流過絳水千里至大陸為地腹如志之言

大陸在鉅鹿

一清按漢志鉅鹿郡鉅鹿縣下云禹貢大鹿澤在北與康成說同

地理

志曰水在安平信都

全氏曰此地理志非班志安帝改信都曰安平則是安帝以後

之書一清按全說是孔穎達尚書正義曰地理志云降水在信都案班固漢書以襄國為信都云云則知此地理志非班志明矣然漢志信都國信都縣下云禹貢絳水亦入海而趙國襄國下不及降水孔氏之

金匱要略卷之八  
卷十  
云未知所指桑欽亦有地理志上  
黨郡屯留下引桑欽言或是也

鉅鹿與信都相去

不容此數也水土之名變易世失其處見降水則以  
為絳水故依而廢讀或作絳字非也今河內共北山  
淇水共水出焉東至魏郡黎陽入河近所謂降水也  
降讀當如郕降于齊師之降蓋周時國于此地者惡  
言降故改云共耳又今河所從去大陸遠矣館陶北  
屯氏河其故道與余按鄭元據尚書有東過洛汭至  
于大伾北過降水至于大陸推次言之故以淇水為

降水共城為降城所未詳也稽之羣書共縣本共和之故國是有共名不因惡降而更稱禹著山經淇出沮如澳衛詩列目又遠當非改絳草為今號但是水導源共北山元欲因成降義故以淇水為降水耳即如元引地說黎陽鉅鹿非千里之逕直信都於大陸者也唯屯氏北出館陶事近之矣按地理志云絳水發源屯留下亂漳津是乃與漳俱得通稱故水流間關所在著目信都復見絳名而東入于海尋其川脈

無他殊瀆而衡漳舊道與屯相亂乃書有過降之文

地說與

一清按與字誤

千里之誌即之途致與書相隣河之

過降當應此矣下至大陸不異經說自甯迄于鉅鹿

出于東北皆為大陸語之纏絡厥勢眇矣九河既播

八枝代絕遺迹故稱往往時存故曷般列于東北徒

駭瀆聯漳絳同逆之狀粗分陂障之會猶在案經考

瀆自安故目矣

禹貢錐指曰冀州疏曰春秋魏獻子田于大陸焚焉還卒于甯杜氏嫌鉅

鹿絕遠以為汲郡修武縣吳澤也甯即修武然此二澤相去甚遠所以得為大陸者以爾雅廣平曰陸但

廣而平者則名大陸故異所而同名焉此說允當修武今獲嘉縣縣西北有吳澤陂其旁近地即大陸也水經濁漳注曰鄭元注尚書引地說云大河東北流過絳水千里至大陸為地腹今淇水東至黎陽入河近所謂降水蓋以淇口應北過降水之文也道元疑之曰黎陽鉅鹿非千里之遠是矣而其下亦云自甯迄於鉅鹿出于東北皆為大陸則以南北兩大陸聯為一地以應千里之數何其無定見也信如鄭言則淇口在黎陽西南距修武二百餘里河之所經當先大陸而後降水矣鄭說亦豈可通乎又曰正義曰地理志降水在信都縣漢以襄國為信都在大陸之西或降水發源在此下尾至今之信都故得先過降水乃至大陸鄭以降讀為下江反聲轉為共河內共縣淇水出焉東至魏郡黎陽縣入河此近降水周時國于此地者惡言降水故謂之共此鄭胸臆不可從也按襄國今為邢臺縣界絕無降源孔說非是鄭注濁漳

引鄭元尚書注言降水字不當作絳是也而讀降為  
邨降于齊師之降以淇水為降水共城為降城則繆  
一清按道元極辨康成降水共城之失未嘗附和雷  
同東焦規之似未允當惜河水篇注脫去釋禹貢北  
過降水之文大致漳水又歷經縣故城西水有故津  
不明啟人疑惑耳

謂之薄落津

一清按續志安平國經西有漳水津名薄落津地理志無經縣鉅鹿郡堂陽縣

下云嘗分為涇縣涇即經蓋前漢已置是縣旋廢而後漢復置之又方輿紀要趙州寧晉縣有楊氏廢縣云周禮職方冀州藪曰楊紆水經注楊紆即大陸澤或曰古有楊城澤流紆迴城下因曰楊紆漢置楊氏縣治焉又云胡盧河在縣東南二十里即禹貢之大陸澤呂氏春秋九藪趙之大陸其一也酈道元以為即楊紆藪亦謂之薄落水亦謂之廣阿澤其上流即漳水也自順德府南和任縣達隆平而東北滙大小



羣川以注于縣境而趙州西境及滹沱河以南諸水亦悉東南流至縣境匯為大澤每至夏秋之交霖潦為患則漳水滹沱南北交注泛濫甚廣東注深冀及阜城獻縣以東至交河縣而合于滹沱丁度曰胡盧河橫漳之別名也冀北之大川胡盧河其最矣宛溪去今未遠所引水經注今本無之蓋從他書採錄耳漢志冀州藪曰楊紆師古曰爾雅曰秦有楊紆而此以為冀州未詳其義及所在也楊紆爾雅作楊陟郭璞注曰今在扶風沂縣西邢昺疏曰周禮雍州澤藪曰弦蒲即此楊陟蓋相承之繆也道元河水注云高誘以為楊紆秦藪非也楊紆不屬雍州則當屬冀方矣足正羣說之失也呂氏春秋云秦之陽華或者以陽華為陽陟乎然禹貢曰九澤既陂爾雅乃有十藪周秦同域周有魚鼈秦有楊紆是多一澤矣呂覽淮南仍作九藪或以洲言或以國言雖各不同要是九而非十

昔袁本初還自易京

上已届此率其賓從

後漢書袁紹傳作賓徒

楔飲於斯津矣衡

漳又逕沙丘臺東紂所成也在鉅鹿故城東北七十

里趙武靈王與秦始皇並死於此矣又逕銅馬祠東

漢光武廟更始三年秋光武追銅馬於館陶大破之

遂降之賊不自安世祖令其歸營乃輕騎行其壘賊

乃相謂曰蕭王推赤心置人腹中安得不投死乎遂

將降人分配諸將衆數十萬人故關西號世祖曰銅

馬帝也祠取名焉廟側有碑述河內修武縣張導字

景明以建和三年為鉅鹿太守

一清按建和漢和帝年號張景明為袁紹

說冀州牧韓馥讓位事在獻帝初平二年相距四十餘年不應如是之久建和字誤當作建安魏書臧洪傳云洪荅陳琳書曰昔張景明親登壇叩血奉辭奔走卒使韓牧讓節主人得地然後但以拜章朝主賜爵獲傳之故旋時之間不蒙觀過之貸而受夷滅漳之禍則景明作郡宜在建安初年而亦為紹所殺

漳汎濫土不稼穡導披按地圖與丞彭參掾馬道嵩等原其逆順揆其表裏修防排通以正水路功績有成民用嘉賴題云漳河神壇碑而俗老耆儒猶揭斯廟為銅馬劉神寺是碑頃因震裂餘半不可復識矣

又逕南宮縣故城西漢惠帝元年沈氏曰是以封張

越人子買為侯國王莽之序中一清按漢志作序下

一清按全氏曰此下有脫文愚謂非也此處無脫誤

列葭水漢志注于南和南和在經縣之西南乃其上

游也長蘆水水經注始見于列入列入合肥鄉田肥

鄉而曲周而廣宗廣宗漢經縣而南宮而堂陽以達

于信都至下博列葭水注之在今深川之域長蘆水

至經縣為薄落津續志鉅鹿郡麀陶有薄落亭可知

其水亦注寧晉泊中矣據道元注薄落津有長蘆渚

水之稱至堂陽乃變列葭之名若此云列葭水出焉

下又云列葭水注之于義豈可通乎近代復以衡漳

為胡蘆河宋史河渠志云胡蘆河源于西山西山即

今廣平順德二府以西之山在漢為鉅鹿郡廣平國

地葭水至深川合于胡蘆河而長蘆本有薄落之稱

故後世變呼為胡蘆漢志有列其水與渴醴通為衡

津

一清按太平寰宇記邢州龍岡縣下云渴水一名

澧水俗謂之百泉水出縣東平地以其導源總納

衆泉合成一川故也亦謂之鴛鴦水魏都賦所云鴛

鴦交合當作交谷劉良曰鴛鴦水在南和縣西交谷

水在鄴南又南和縣下引水經注云北有和城縣故

此云鴛鴦之水在縣北五里水經注云南和西官治

東有便水一名鴛鴦水又沙河縣下云沙河即渴水

也水經云渴水出趙國襄國按胡三省通鑑注引水

經此句下東過沙河縣五字宋白曰沙河即渴水也

漢志趙國襄國渠水所出東北至任入寢又有蓼水

馮水皆東至朝平入渴師古曰渴音藕又音牛吼反

說文渴水出趙國襄國之西山東北入寢渠水字誤

寢即漳也列子牛缺下之邯鄲運鹽于藕河之中即

渴水也又龍岡縣下云蓼水一名達活口水水經云蓼

水出襄國西石井岡岡上有井大如車輪按朱氏升  
曲洧舊聞云去鉅鹿郡西北一舍有泉水經名達活  
源流深長廣輪數百步享其利又內邱縣下引水經  
云中邱有蓬鵲之山按全氏曰漢志常山郡中邱縣  
蓬山長谷諸水所出東至張邑入濁說文亦云水出  
中邱蓬山長谷即蓬鵲之山也諸水是渚水之誤入  
濁是入渴之誤內邱有渚水亦名礪水張縣後省入  
任縣其地一名曰渚陽城在渚水之陽也晉書段  
疾陸眷攻石勒屯渚陽即此又龍岡縣下引水經云  
鵲山有穴出雲母其西有龍騰溪鵲渡嶺按太平御  
覽引水經注曰石勒時大旱沙門佛圖澄于石井岡  
掘得死龍長尺餘漬之以水良久乃蘇咒而祭之龍  
騰而上天即雨降因名龍岡  
凡此諸所引文今本皆無之  
又有長蘆滛水之名絳  
水之稱矣今漳水既斷絳水非復纏絡矣又北絳漬

出焉今無水故漳東南逕九門城南又東南逕南宮

城北又東南逕繚城縣故城北十三州志曰經縣東

五十里有繚城故縣也左逕安城南故信都之安城

鄉也更始二年和成太守邳彤全氏曰按後漢書光武帝紀王莽和成卒

正邳彤亦舉郡降注引東觀記曰王莽分鉅鹿為和戎郡卒正職如太守邳彤傳亦作成字注又引東觀

記為證太守之稱與上會信都南安城鄉上大悅即善長之率筆耳

此處也故瀆又東北逕辟陽亭漢高帝六年封審食

其為侯國一清按漢書張陳王周傳云辟陽近溜川疑非趙地審食其封邑當是洙水篇之辟

陽城城陽項王子節侯  
壯亦封辟土侯是也

王莽之樂信也地理風俗記

曰廣川西南六十里有辟陽亭故縣也絳瀆又北逕

信都城東散入澤渚西至于信都城東連于廣川縣

之張甲故瀆同歸于海故地理志曰禹貢絳水在信

都東入于海也

禹貢雖指曰漢志雜採古記故漳絳  
二水並存實一川也漳絳本入河及

河徙之後漳絳循河故道而下故道元云水流間闕  
所在著稱信都復見絳名而東入于海也然漢志信  
都之絳水則又有別志云故章河在北東入海禹貢  
絳水亦入海蓋縣北故漳即禹河之故道而絳水出  
其南則漳水之徙流酈元之所謂絳瀆者也蓋漢時  
信都之漳水徙從其縣南故地志以此為絳水而目



縣北之瀆曰故漳河其後漳又復北道故水經叙漳水仍自信都縣西東北過下博縣而鄆元云絳瀆今無水唐人遂謂之枯澤通典云清河郡經城縣界有枯降渠北入信都郡界是也此渠乃漳水一時之徙流漢志以為禹貢之絳水大繆而杜佑據以分冀充之界自後說經者動稱枯澤以證導河之所過皆班固禹貢二字誤之也

## 又北過堂陽縣西

衡水自堰分為二水其一水北出經縣故城西世祖自信都以四千人先攻堂陽降水者也水上有梁謂之旅津渡商旅所濟故也其右水東北注出石門門

石崩褫餘基殆在謂之長蘆水蓋變列葭之名也

太平

寰宇記滄州清池縣下引水經云長蘆水出列人縣以其水旁多蘆葦故名今本無之一清按太平寰宇記邢州南和縣下云列家水在縣西南十里下至狼溝河今邢臺沙河南和之界有東西狼河即百泉三支流下流入澧亦謂之小澧河即注上云其水與澧澧通為衡津者也其史所云與漢志合是沙邱堰以下後人又有長蘆之稱而道元下文仍以列四葭之名歸之

長蘆水東逕堂陽縣

故城南應劭曰縣在堂水之陽穀梁傳曰水北為陽也今於縣故城南更無別水唯是水東出可以當之斯水蓋包堂水之兼稱矣長蘆水又東逕九門陂故

縣也

一清按九門陂在漢九門縣陂即縣以受氏九門本趙邑見史記趙世家漢為縣屬常山郡後

漢晉因之後魏徙常山郡治此北齊廢自漢迄招跋朝無省併之事道元云故縣中間必有遺徙而史忘不之詳也又東逕扶柳縣故城南世祖建武三十年封寇

恂子損為侯國又東屈北逕信都縣故城西信都郡

治也漢高帝六年置景帝二年為廣川惠王越國清

按劉敞曰景帝前二年初封王子彭祖為廣川王都信都四年徙趙國除為信都郡中二年封王子越為廣川王傳國至王汝陽廢常甘露四年也百官表成帝永始二年有信都太守是廣川國除為郡矣後漢志劉昭注云安平故信都高帝置又志云景帝增六郡若信都為高帝置則又不及此數疑當云景帝前

二年為廣川國四年為信都郡中二年復為廣川國宣帝甘露四年復故也王莽更為新

博縣曰新博亭光武自薊至信都是也明帝永平十

五年

一清按漢志作樂安誤也當以續志鄭注正之

安帝延光中改曰安平

城內有漢冀州從事安平趙徵碑又有魏冀州刺史

陳留丁紹碑青龍三年立

一清按丁紹見晉書良吏傳在惠帝之末去魏代已

遠寰宇記冀州信都縣下引郡國縣道記亦云信都城內有曹魏冀州刺史陳留丁紹頌德碑青龍三年

立疑別是一人

城南有獻文帝南巡碑其水側城北注又北

逕安陽城東又北逕武陽城東十三州志曰扶柳縣

東北有武陽城故縣也又北為博廣池池多名蟹佳  
蝦歲貢王朝以充膳府又北逕下博縣故城東而北  
流注于衡水也

又東北過扶柳縣北又東北過信都縣西

扶柳縣故城在信都城西衡水逕其西縣有扶澤澤

中多柳故曰扶柳也

一清按漢志注  
此是闕駟說

衡水又北逕昌

成縣故城西地理志曰信都有昌成縣漢武帝以封

城陽項王子劉差為侯國

一清按史表云昌侯劉差  
索隱曰志屬瑯琊漢表同

而地理志信都國昌成縣下云侯國王子侯表廣川  
繆王子節侯元以宣帝神爵三年封為昌成侯故而  
瑯琊郡昌縣闕駟曰昌成本名阜城矣應劭曰堂陽  
下無之也

縣北三十里有昌成故縣也世祖之下堂陽昌成人

劉植率宗親子弟據邑以奉世祖是也又逕西梁縣

故城東地理風俗記曰扶柳縣西北五十里有西梁

城故縣也世以為五梁城蓋字狀致繆耳衡漳又東

北逕桃縣故城北漢高祖十二年封劉襄為侯國

清一

按史表云項氏親賜姓

王莽改之曰桓分也合斯洩故瀆斯洩

水首受大白渠大白渠首受綿蔓水上承桃水水出

樂平郡之上艾縣東流世謂之曰桃水東逕靖陽亭

南故關城也又北流逕井陘關下注澤發水

太平寰宇記平

定軍平定縣下云澤發水一名畢發水一名阜漿水一名妬女泉郡國志云子推妹也水經注云澤發水

逕董卓壘東今本無之亂流東北逕常山蒲吾縣西而桃水出

馬南逕蒲吾縣故城西又東南流逕桑中縣故城北

世謂之石勒城蓋趙氏增城之故擅其目又謂高功

城也地理志曰侯國也

一清按漢書王子侯表宣帝地節二年封趙頃王子廣漢

為桑中戴侯

桃水又東南流逕綿蔓縣故城北王莽之綿

延也世祖建武二年封郭況為侯國自下通謂之綿

蔓水綿蔓水又東流逕樂陽縣故城西右合井陘山

水水出井陘山世謂之鹿泉水也東北流屈逕陳餘

壘西俗謂之故壁城昔在楚漢韓信東入餘拒之於

此不納左車之計悉衆西戰信遣奇兵自間道出立

幟於其壘師奔失據遂死泚上其水又屈逕其壘南

又南逕城西東注綿蔓水

全氏曰漢志常山郡元氏縣下云沮水首受中丘窮



泉谷東至堂陽入橫河而水經無聞及讀郭氏山經注曰泚水今出中丘窮泉谷乃悟泚水之誤為沮水也一清按太平寰宇記趙州臨城縣下引水經注云泚水東出房子城西出白土細滑如膏可用濯綿色奪霜雪光彩鮮潔異于常綿俗以為美談言房子之續也抑亦如蜀錦之得濯江矣按御覽引此注云故歲貢其錦以充御用又縣有百暢亭水經注云泚水東逕百暢亭又漢志常山郡房子縣贊皇山石濟水所出東至癭陶入泚石邑縣井陘山在西汶水所出東南至癭陶入泚寰宇記鎮州石邑縣下云文水一名童水注水經云汶水出常山郡石邑縣又獲鹿縣下飛龍山引水經注云汶水東逕飛龍山北是井陘口今又名土門又趙州平棘縣下引水經云汶水又東逕平棘縣南有石橋跨水濶四十步長五十步橋東有兩碑又石柱下引水經云平棘城南門夾道有兩石柱翼路若闕焉汶水即汶水也汶汶字近致訛

又九域志邢州古跡千言山引水經云泚水又東南  
逕千言山邙詩云出宿于千飲餞于言是也趙州沃  
州城引水經云沃水東至沃州城入于沃湖按魏書  
地形志鉅鹿郡廕陶縣有沃州城又趙州有平州城  
引水經云槐水又逕平山南按地形志趙郡房子縣  
有平州城寰宇記平棘縣下引水經注云槐水出黃  
石山山海經曰泚水東流注于彭水顧景范曰水經  
以為一名槐水者也又寰宇記趙州高邑縣下引水  
經注云漢章帝北巡至高邑亦光武即位于此有石  
壇壇有圭頭碑即帝所建章懷後漢書注引水經注  
曰亭有石壇壇有圭頭碑其陰云常山相狄道馮龍  
所造壇廟之東枕道有兩石翁仲相對焉凡此引文  
今本皆無之

綿蔓水又屈從城南俗名曰臨清城非也地

理志曰侯國矣

一清按王子侯表宣帝地節二王莽  
年封趙頃王子說為樂陽繆侯

更之曰暢苗者也東觀漢書曰光武使鄧禹發房子  
兵二千人以鉞期為偏將軍別攻真定宋子餘賊拔  
樂陽稟肥纍者也綿蔓水又東逕烏子堰枝津出焉  
一清按漢志太原郡上艾縣綿蔓水東至蒲吾入潯沱水而注畧焉又東謂之大白渠

地理志所謂首受綿蔓水者也白渠水

全氏曰潯水所入有白渠

有大白渠猶斯洑之與洑不可混也今于常山之大白渠芟去大字則何以別于武安之白渠又東

南逕關縣故城北地理志曰常山之屬縣也又東為  
成郎河水上有大梁謂之成郎橋又東逕宋子縣故

城北又謂之宋子河漢高帝八年封許惲為侯國王莽更名宜子昔高漸離擊筑傭工自此入秦又東逕敬武縣故城北按地理志曰鉅鹿之屬縣也漢元帝封女敬武公主為湯沐邑闕駟十三州記曰楊氏縣北四十里有敬武亭故縣也今其城實中小邑耳故俗名之曰敬武壘即古邑也白渠水又東謂之斯浹水地理志曰大白渠東南至下曲陽入斯浹河者也東分為二水枝津右出焉東南流謂之百尺溝又東

南逕和城北世謂之初邱城非也漢高帝十一年封

郎中公孫耳為侯國

全氏曰和城乃王莽所分鉅鹿之支郡見于東觀漢記在下曲

陽一作戎而常山別有和成則公孫耳所封王莽更名鄔為和成亭是也今是注上言敬武下言貫城是

鉅鹿之和成非禾成也注引侯表不已繆乎

又東南逕貫城西漢高帝六

年封呂博為侯國

一清按史表勣齊侯呂徐廣曰呂一作台漢表貫齊侯合傳胡害是

侯不姓呂而注云呂博豈字近合傳故耶

百尺溝東南散流逕歷鄉東而

南入泚湖東注衡水也斯浚水自枝津東逕貫城北

又東積而為陂謂之陽縻淵淵水左納白渠枝水俗

謂之祗水

朱氏謀埠箋曰李克家云疑作泚水

水承白渠於藁城縣之

烏子堰又東逕肥壘縣故城南又東逕陳臺南臺甚

寬廣今上

全氏曰下有脫文

陽臺屯居之又東逕新豐城北

按地理志云鉅鹿有新市縣侯國也

一清按王子侯表元帝元鳳五

年以封廣川繆王子康侯吉又功臣表

景帝以封趙內史王棄之皆國于此王莽更之曰

樂市

一清按漢志分注作市樂疑彼文為誤

而無新豐之目所未詳矣

一清按史記趙世家悼襄王四年龐煖將趙楚魏燕之說師攻秦蕞不拔移攻齊取饒安徐廣曰蕞在新豐饒安在勃海又云饒屬北海安屬平原此新豐非咸陽之新豐今葉城縣東北有新豐城隋置新豐縣

屬鉅鹿郡蓋錄舊名耳葢地無考漢表書王子侯有前侯信濟北貞王子表云平原師古曰字或作葢側流反史記建元以來王子侯表前作葢徐廣曰一作葢字誤也蓋即葢字索隱曰葢音緦則亦以為葢字矣葢葢皆與葢字相近未審其的

其水又東逕昔陽城南世謂之曰

直陽城非也本鼓聚矣春秋左傳昭公十五年晉荀

吳帥師伐鮮虞圍鼓三月鼓人請降穆子曰獲一邑

而教民急將焉用邑邑以賈急不如完舊賈急無卒

棄舊不祥鼓人能事其君我亦能事吾君率義不與

好惡不愆城可獲而民知義所有死命而無二心不

亦可乎鼓人告食竭力盡而後取之克鼓而返不戮  
一人以鼓子爲鞮歸既獻而返之鼓子又叛荀吳畧  
東陽使師偽糴負甲息于門外襲而滅之以鼓子爲  
鞮歸使涉佗守之者也十三州志曰今其城昔陽亭  
是矣京相璠曰白狄之別也下曲陽有鼓聚故鼓子

國也

一清按顧氏炎武曰知錄曰水經注一卷昔陽城兩見一在下曲陽一在沾縣誤也方輿紀要

云晉州昔陽亭在州東南應劭曰下曲陽有鼓聚昔陽亭左傳昭二十二年鼓叛晉晉荀吳略東陽使師偽糴者負甲以息于昔陽之門外遂襲克之此鼓子所都之昔陽也又有昔陽城爲肥子所都在今山西



樂平縣東南五十里左傳昭十二年晉荀吳入昔陽滅肥以肥子繇皋歸杜預曰樂平沾縣東有昔陽城此肥子所都之昔陽也如紀要之云亦或異地而同名矣  
白渠枝水又東逕下曲

陽城北又逕安鄉縣故城南地理志曰侯國也一清按王

子侯表元帝竟寧元年封趙哀子喜為安鄉孝侯是也  
又東逕貫縣入斯浚水

斯浚水又東逕西梁城南又東北逕樂信縣故城南

地理志曰鉅鹿屬縣侯國也一清按王子侯表宣帝神爵三年封廣川繆王

子彊為樂信頃侯  
又東入衡水一清按漢志真定國縣蔓縣斯浚水首受大白渠東至鄴

入河蓋即衡水又北為袁譚渡蓋譚自鄴往還所由

故濟得厥名

又東北過下博縣之西

衡水又北逕鄆縣故城東竹書紀年梁惠成王三十

年秦封衛鞅于鄆改名曰商即此是也故王莽改曰

秦聚也地理風俗記曰縣北有鄆阜蓋縣氏之一清

按後

漢書光武帝紀注引竹書紀年云衛鞅封鄆續志鉅

鹿郡鄆縣漢志作鄆師古曰音若么反鄆字是鄆字

之誤觀班志綿曼縣下分注作鄆可見若衛鞅封邑

在宏農之商縣地理志云秦相衛鞅邑也史記秦本

紀孝公二十二年封鞅為列侯號曰商君正義曰商

州商洛縣又本傳正義曰於商在鄧州內鄉縣東七

里古於邑也然則何得云在鉅鹿之地乎全氏曰蕭該誤音鄆為鄆臧矜又誤音為鄆按鄆是太原之邑鄆是鉅鹿之邑並屬趙秦何由得取其地以封鞅乎王莽以鄆為秦聚固非道元謂莽以鄆為秦聚尤繆蓋析縣之南鄉有鄆亭道通武關見王莽傳即鄆夷招降析宰之處正商於之地豈鉅鹿之謂乎通典舊唐書作鄆寰宇

又右逕下博縣故城西王莽改曰閔

記作鄆亦非

博應劭曰太山有博故此加下章懷後漢書注曰在博水之下故曰下博

漢光武自呼沱南出至此失道不知所以遇白衣老父曰信都為長安守去此八十里世祖赴之任光開門納焉漢氏中興始基之矣尋求老父不得議者以

為神衡漳又東北歷下博城西逶迤東北注謂之九

嶂

一清按寰宇記引信都記云謂之九嶂曲即今衡水縣之鹽苦二河也

西逕樂鄉故

城南王莽更之曰樂丘也又東引葭水注之

全氏曰漢志廣

平國南和縣列葭水東入瀟說文瀟水出趙國襄國東入濁善長略瀟不叙賴說文尚存其迹耳一清按漢書武五子燕刺王傳使人祠葭水台水晉灼曰葭音家寰宇記因作列家水也列葭水見漢志水經注作引葭水竊意引長也葭蘆也攷變引葭為長蘆引之字列字形相似正可與班書參異同耳

又東北過阜城縣北又東北至昌亭與虘池河會

經叙阜城於下博之下昌亭之上考地非比於事為

同勃海阜城又在東昌之東故知非也

全氏曰據此是後漢安平

國之阜城乃前漢信都國之昌成故注明其非勃海之阜城也而魏書地形志武邑郡阜城下云前漢屬勃海後漢屬安平蓋合縣而為一非也漳水又東北逕武邑郡南魏所

置也又東逕武強縣北又東北逕武隧縣故城南按史記秦破趙將扈輒於武隧斬首十萬即於此處也

王莽更名桓隧矣白馬河注之水上承虜池東逕樂

鄉縣北饒陽縣南

一清按章懷後漢書注曰呼沱河舊在饒陽南至魏太祖曹操因饒

河故瀆決令北注新溝水所以今在饒陽縣北

又東南逕武邑郡北而東入

衡水謂之交津口衡漳又東逕武邑縣故城北王莽

之順桓也晉武帝封子於縣以為王國後分武邑武

隧觀津為武邑郡治此

一清按晉志無武邑郡地形志云武邑郡晉武帝置又云

魏所置注前後兩仍其說宜以此文為正也

衡漳又東北右合張平口故

溝上承武強淵淵之西南側水有武強縣故治故淵

得其名焉東觀漢記曰光武拜王梁為大司空以為

侯國耆宿云邑人有行於途者見一小蛇疑其有靈

持而養之名曰擔生長而吞噬人里中患之遂捕繫

獄擔生負而奔邑淪為湖縣長及吏咸為魚矣今縣  
治東北半里許落水淵水又東南結而為湖又謂之  
郎君淵耆宿又言縣淪之日其子東奔又陷於此故  
淵得郎君之目矣淵水北通謂之石虎口又東北為  
張平澤澤水所泛北決堤口謂之張刀溝北注衡河  
謂之張平口亦曰張平溝水溢則南注水泛則輟流  
衡漳又逕東昌縣故城北經所昌亭也王莽之田昌  
也俗名之曰東相蓋相昌聲韻合故致茲誤矣西有

昌城故目是城為東昌矣衡漳又東北左會虜池故

瀆謂之合口

一清按史記正義引水經曰漳水一名大漳水魚有殺水之目也漢志魏郡武

安縣甯水東北至東昌入虜池河過郡五行六百一里師古曰甯子稚反說文瀼水出魏郡武安東入虜池水从水蔓聲蔓籀文侵

字即衡漳也又謂之橫河

衡漳又東北分為二川當

其水洸處名之曰李聰渙

又東北至樂成陵縣別出北瀆

一清按注云陵字是桓帝所加此亦經文晚出

之證

衡漳於縣無別出之瀆出縣北者乃虜池別水分虜



池故瀆之所纏絡也衡漳又東分為二水左出為向氏口瀆水自此決入也衡漳又東逕弓高縣故城北

漢高帝封韓信兄子韓鵄當為侯國

沈氏曰漢表是文帝十六年封

信傳是十四年封非高帝黃慎中本作景帝亦非且是信孽子非兄子也王莽之樂成亭

也一清按漢志河間國分注莽改樂成為陸信弓高為樂成今本落亭字當以水經注補之衡漳

又東北右合柏梁澁水上承李聰渙東北為柏梁澁

東逕蒲領縣故城南漢武帝元朔三年封廣川王

清

按王子侯表是惠帝子劉嘉為侯國地理風俗記曰修縣西北

八十里有蒲領鄉故縣也

太平寰宇記阜城縣下云故蒲領城水經云今滄州

魯城縣東北六十里漳河西岸又有北蒲領故城蓋因漢末黃巾之亂有蒲領人流寓于彼遂立此城今本無又東北會桑社枝津又東北逕弓高城北又東

注衡漳謂之柏梁口衡漳又東北右會桑社溝溝上

承從陂世稱盧達從薄亦謂之訶摩河

一清按此即漢志代郡南

城縣下之從河也訶摩當作摩訶梵語謂大為摩訶蓋言大河也

東南通清河西

達衡水春秋雨泛漳澤津渚今觀津城北方二十里

盡為澤數蓋水所鍾也其瀆逕觀津縣故城北樂毅

自燕降趙封之於此邑號望諸君王莽之朔定亭也

又南屈東逕竇氏青山南側隄東出青山即漢文帝

竇后父少翁冢也翁即是縣人

一清按唐書宰相世系表竇建德傳竇后

父安成侯充今誤本水經注作少消寔字記引隋圖經作后父青舊唐書竇建德傳遣使往灌津祠竇青之墓青是其名消乃青之誤文而下

遭秦之亂漁釣

云民號青山或山以人名受氏也

隱身墜淵而死景帝立后遣使者填以葬父起大墳

於觀津城東南故民號曰青山也又東逕董仲舒廟

南仲舒廣川人也世猶謂之董府君祠春秋禱祭不

輟舊瀆又東逕脩市縣故城北漢宣帝本始四年封  
清河綱王子劉寅為侯國王莽更之曰居寧也俗謂  
之溫城非也地理風俗記曰脩縣西北二十里有脩  
市城故縣也又東會從陂陂水南北十里東西六十  
步子午潭漲淵而不流亦謂之桑社淵從陂南出夾  
隄東派逕脩縣故城北東合清漳漳泛則北注澤盛  
則南播津流上下互相逕通從陂北出東北分為二  
一川北逕弓高城西而北注柏梁差一川東逕弓高

城南又東北陽津溝水出焉左瀆北入衡漳謂之陽  
津口衡水東逕阜城縣故城北樂成縣故城南河間  
郡治地理志曰故趙也漢文帝二年別為國應劭曰  
在兩河之間也景帝九年封子德為河間王是為獻  
王王莽更名郡曰朔定縣曰陸信褚先生曰漢宣帝  
地節三年封大將軍霍光兄子山為侯國也

一清按此是褚

表之繆而道元誤承之者褚先生云樂成侯霍山索  
隱曰表在平氏志屬南陽今按漢表霍山封樂平非  
樂成也表云東郡後褚先生又云樂平侯許翁孫而  
小司馬無說漢表許延壽封樂成侯翁孫疑是延壽

字故表云平氏平氏樂成均屬南陽郡南陽之樂成其地無考大約與平氏相近地理志南陽樂成下云侯國而河間國之樂成無說則非列侯食邑可知第猶少孫志宣帝世不遠不應參錯乃爾抑或後人傳寫之誤使兩家封邑對換一字道元引之小司馬釋之均未細覈班書耳然班固于霍山樂平封邑下云東郡地理志東郡清縣師古曰注引應劭曰章帝更名樂平則何以宣帝時即有此封不可曉也互見漂水篇漢章帝封子開於此漢桓帝追尊祖父孝王開為

孝穆皇以其邑奉山陵故加陵曰樂成陵也今城中有故池方八十步舊引衡水北入城注池池北對層臺基隍荒蕪示存古意也

又東北過成平縣南合清河

衡漳又東逕建成縣故城南按地理志故屬勃海郡

褚先生曰漢宣帝五鳳三年封丞相黃霸為侯國也

全氏曰按本表曰沛而善長以為勃海

成平縣故城在北漢武帝元朔

三年封河間獻王子劉禮為侯國

一清按索隱曰表在南皮今漢表作

平成侯禮又不云在南皮皆為脫誤也

王莽之澤亭也城南北相直衡

漳又東右會陽津溝水自溝水東逕阜城南地理志

勃海有阜城縣王莽更名吾城者也非經所謂阜城

也建武十五年世祖更封大司馬王梁為侯國陽津

溝水又東北逕建成縣左入衡水謂之陽津口衡漳

又東左會虓池別河故瀆

一清按漢志勃海郡成平縣下云潯沱河民曰徒駭

又河間國樂成縣虓池別水首受虓沱河東至東光入潯沱河又弓高縣下云潯沱別河首受潯沱河東至平舒入海代郡鹵城下云虓沱河東至參合入潯沱別按別下脫水字以漢志注并水經驗之可証也

又東北合清河謂之合口又逕南皮縣之北皮亭而

東北逕浮陽縣西浮水東北注之

又東北過章武縣西又東北過平舒縣南東入海



清漳自章武縣故城西故潏邑也枝潏出焉謂之潏  
水東北逕參戶亭分為二潏應劭曰平舒縣西南五  
十里有參戶亭故縣也世謂之平虜城枝水又東注  
謂之蔡伏溝又東積而為淀一水逕亭北又逕東平  
舒縣故城南代郡有平舒故加東地理志曰勃海之  
屬縣也魏土地記曰章武郡治故世以為章武故城  
非也又東北分為二水一水右出為潏一水北注呼  
池謂之潏口與清漳亂流而東注于海

一清按漢志則濁漳自鄴

以下皆清漳之流而水經注皆以為濁漳與漢志辰至此忽叙入清漳蓋欲應漢志濁漳入清漳清漳入河之說然不云入河而云入海是又與漢志異今清漳注尾又缺而無以辨之

清漳水出上黨沾縣西北少山大壘谷南過縣西又從縣南屈

淮南子曰清漳出謁戾山高誘曰山在沾縣今清漳出沾縣故城東北俗謂之漳山漢分沾縣為樂平郡治沾縣水出樂平郡沾縣界故晉太康地記曰樂平縣舊名清漳漢之故名矣其山亦曰鹿谷山水出大

要谷南流逕沾縣故城東不歷其西也又南逕昔陽

城左傳昭公十二年晉荀吳偽會齊師者假道於鮮

虞遂人昔陽杜預曰樂平沾縣東有昔陽城者是也

全氏曰既云偽會齊師則不在樂平沾縣明矣杜既  
誤注而道元因之一清按昔陽有二此本杜說然其  
事則大有可疑者據傳是晉荀吳偽會齊師乘其無  
備也而入其國都是役也實滅肥傳故申之曰晉伐  
鮮虞因肥之役也入昔陽是一事滅肥又一事至昭  
二十二年負甲息于昔陽之門外遂滅鼓此與假途  
滅虢事紀相類昔陽非肥國都宜在鉅鹿之下曲陽  
不應在上黨之沾縣也道元蓋襲杜注而不之察耳  
顧棟高春秋大事表杜注正譌曰昭十二年傳晉荀  
吳偽會齊師者假道于鮮虞遂入昔陽秋八月壬午

滅肥杜注鮮虞在中山新市縣昔陽肥國都樂平沾縣  
東有昔陽城又云鉅鹿下曲陽縣西有肥累城高氏曰  
漢沾縣屬上黨郡晉屬襄平郡地在太行之東去中  
山絕遠劉炫駁杜曰齊師當自晉而東行假道鮮虞  
遂入昔陽則昔陽在鮮虞之東明矣襄平沾縣在中  
山新市西南五百餘里何當假道于東北之鮮虞而  
反入西南之昔陽也既入昔陽而別言滅肥則肥與  
昔陽不得為一安得以昔陽為肥國之都昔陽既是  
肥都何以復言鉅鹿下曲陽有肥累城謂肥名取于  
彼乎肥為小國境不必遠豈肥名取鉅鹿之城而建  
都于襄平之縣也二十二年傳云荀吳使師偽糴者  
負甲以息于昔陽之門外遂襲鼓滅之則昔陽之為  
鼓都信矣何以復云肥都是說也孔穎達嘗反覆辨  
之意在回護杜氏輾轉支離至末後之說仍依然折  
而入于劉蓋杜見滅肥之後文繫于昔陽之下遂疑  
昔陽為肥都而不復記其稱于滅鼓之傳今案前後

漢志及水經注所言皆同劉說當從之案高氏此論極為精細肥國都當以杜注鉅鹿下曲陽為是樂平沾縣之說非也劉炫云肥鼓曲陽鼓都即隋鼓城縣開皇十八年以昔陽縣改置是知昔陽為鼓都非肥都也肥都在真定府藁城縣西南七里魏收志藁城有肥累城即杜注鉅鹿下曲陽之肥累城也若沾縣之昔陽乃在今山西平定州樂平縣東五十里俗呼夕陽城相去絕遠矣其水又南得梁

榆水口水出梁榆城西大嶸山水有二源北水東南流逕其城東南注于南水南水亦出西山東逕文當城北又東北逕梁榆城南即閼與故城也秦伐韓閼與惠文王使趙奢救之奢納許歷之說破秦於閼與

謂此也司馬彪袁山松郡國志並言湮縣有閔與聚

盧諶征艱賦曰訪梁榆之虛郭弔閔與之舊都袁豹

亦云閔與今梁榆城是也漢高帝八年封馮解敢為

閔氏侯國

全氏曰閔氏非閔與侯表有誤文索隱曰在安定亦非一清按史漢表之閔氏索隱

以為安定蓋即地理志安定郡之烏氏縣也續志作烏枝古篆文烏與於相似後人又加一門字馮解散之封宜在彼全氏以小司馬為非未之審耳其水右合北水北水又東南

入于清漳清漳又東南與轅水相得轅水出轅河縣

西北轅山南流逕轅河縣故城西南東流至粟城注

于清漳也

初學記儀州下引水經注曰黃嵩水出遼山縣西黃岡下寰宇記遼州遼山縣下引

水經注云清谷口水源出東北長山清谷亦云縣西南黃巖山轅水出也今本無之一清按遼山當作轅陽河東圖云漢為遼縣地後漢于此置陽阿縣俱屬上黨郡晉改為轅陽縣屬樂平郡後魏太武併入武鄉明帝改轅陽為遼陽隋初改置遼山縣屬并州因縣西北轅山為名注中轅河之名不知何昉遼陽水從平城縣西北八賦嶺下出名八賦水經遼陽城名遼陽水又東合清漳為漳水也元和志云後漢於此置轅河縣今續志無之

東過沙縣西屈從縣南

一清按兩漢志本作沙縣至三國時始有沙名魏書云太祖聞

鄴涉長梁岐以縣降是也

按地理志云魏郡之屬縣也漳水於此有涉河之稱  
盖名因地變也

東至武安縣南叅害邑入于濁漳

朱氏諱埤箋曰謝云此下疑脫注

補  
滏水

山海經北山經曰又北三百里曰神菌之山滏水出  
焉而東流注于歐水御覽引水經注滏水發源出石  
鼓山南巖下泉源奮涌若滏之揚湯矣其水冬溫夏  
冷崖上有魏世所立銘水上有祠能興雲雨又東流




注于漳謂之合河又曰水經注云浮圖澄別傳曰石  
虎時自正月不雨至六月澄日詣滏祠稽首暴露即  
日二白龍降于祠下于是雨遍千里劉昭郡國志補  
注引水經鄴西北滏水熱故名滏口滏亦合漳之大  
川也

補  
洺水

初學記邢州下引水經注曰洺水一名漳水俗名千  
步又水經注曰洺水東逕柏暢亭又洺州下引水經

注曰狗山頂上有狗迹今在臨洛縣西又水經注曰  
洛水東北逕廣平縣故城東水積于大澤之中為澄  
泉南北四十里東西二十里亦謂之黃塘泉寰宇記  
磁州武安縣下引水經注云洛水出易陽縣西山洛  
州永年縣下云風土記云南易水本名漳水源出三  
門山西自肥鄉縣界流入趙地記云六國時此水名  
易水埤蒼及水經云洛水之目不知誰改俗謂山之  
下地名洛水因經之故曰洛水九域志邢州古跡引

水經云洺水東流逕曲梁城按曲梁城見漳水篇列  
人縣注中蓋清濁二漳會流于滹池斯有洺水之目  
今文絕無此水然蛛絲馬跡猶可尋求也



水經注釋卷十